

分宜縣志卷二二

人物志

嶺以袁閔名里以陳重名地以人重也邑山水之秀鬱爲英流磊落相望謂非閭里光哉昔班固古今人表以九品差等人物論者少之良由品目旣繁銖兩失當也茲惟統而一之志人物

東漢

陳重字景公宜春人

今隸分宜旌儒鄉

少與鄱陽雷義爲友俱

學魯詩顏氏春秋太守張雲舉重孝廉重以讓義雲不聽義明年舉孝廉重與俱在郎署有同署郎負息



錢數十萬責主日至重密以錢代還終不言惠又同舍郎有告歸寧者誤持鄰舍郎綺去主疑重所取重不自申說市綺賞之後寧喪者歸以綺還主其事乃顯與義俱拜尚書郎義黜退重亦以病免後舉茂材除細陽令政有異化拜侍御史卒

後漢書

按人物志陳重與雷義後皆不仕同隱居雞足山

卒合葬今其地名陳雷里

唐

盧肇字子發宜春人

今隸分宜文標鄉

兒時見宜春令盧蔓奇

之曰子異日當有聞肇於是益力於學舉會昌三年

鄉試入京獻書侍郎王起時起知貢舉遂擢進士第一授潼關防禦判官初肇之未舉也李德裕謫州長史殊遇肇後肇應進士德裕復入相見肇至曰吾喜爲金榜得狀元矣遂魁天下雖受裕知絕無倚附久之使相盧商大尉裴休左僕射盧簡求先後奏辟從事稍遷著作郎除倉部員外郎充集賢院學士持節歙州諸軍事肇於是觀日月之運察盈虛之理爲海潮賦成上之詔褒諭宣付史館移鎮宣池二州遷吉州刺史卒所著有文標集子文秀咸通中進士爲長安令有聲官至宏文館學士

豫章書

李服宜春人

今隸邑南
下午村

父游刺史封宜春侯服治易詩

書教授弟子累徵不應詔錫以粟帛賜號三經處士

嘉靖志

按李服為游之子縣志作唐人物嘉靖府志作宋者誤

盧邈宜春人

今隸分宜
文標鄉

肇族子唐末預湖南計偕舉進

士獻迴文詩三百首官至秘書省正字

人物志

南唐

盧絳字晉卿自言唐中書舍人肇之後讀書畧通大指

喜論當時利病屢舉進士不第往來金陵丹陽間久

之乃上書論事陳喬異之用為沿江巡檢募亡命習

水戰宋師來討以絳為凌波都虞侯守秦淮水柵屢

勝諸將忌其能說後主遣出授潤州節度使劉澄出

送降欵率所部走保宣州金陵陷絳獨不降謀南據

閩中過歙州怒刺史龔慎儀不出迎殺之而行太祖

使絳弟襲招之至京師授冀州團練使遇慎儀兄子

穎於朝曰是殺我叔父者執至殿陛訴冤詔屬吏樞

密使曹彬言其材畧可用願宥其死使自効太祖曰

是貌類侯霸榮何可留也斬於西市

南唐書

宋

夏侯錫天聖二年進士衡州司理叅軍稍遷吉州判官
歷知南康興化軍皆以善政聞治平中轉朝奉郎都
官屯田郎中致仕子公績元豐八年進士裔孫士章
元末登第官終瑞州路學教授

人物志

李士安字永和城西人以特奏同學究出身爲人不妄
喜怒累爲州牧後請老得養生之術視聽不衰年九
十七卒官至朝奉大夫

人物志

宋斌字文叔袁州分宜人少從黃幹李燾登朱子之門
受四書大義學禁方嚴羈旅困阻年且八十矣臨安
尹趙興權延之事以父行奏乞用旌禮布衣故事不

報死葬于西湖上私謚淳固先生與權歲一祭焉斌
游大賢之門屢賢尹之禮其問學行誼有足稱者雖
同寓居湖山而不得如林逋徐復顯被旌禮斯遇不

遇之異哉

據杭州府志採入

李觀士安從姪度量如漢黃叔度文章如唐元次山嘗
著論有顏子幾之內孔子幾之外之說史傳諸書過
目成誦慶歷二年試南宮賦偶失韻主司嘉其策特
奏名登第時方冠知清江縣事熙寧初爲大官令會
重修御廚奉神宗旨撰記尋言役法不便出俸括蒼
題詩值廳有自知不是公侯骨夜夜江山入夢來之

句元祐初監江州太平興國司馬光爲相以書召觀
觀許之後淹留江上日久比至京光已薨除虔州不
就請監南嶽廟以歸觀嘗創玉谿洞自號玉谿叟爲
之傳洞有抱一堂水仙亭香雪塢錦繡谷常醉吟其
申於世味淡如也少好神仙常遇異人劉海蟾後撰
萬載燕州神記及岳川呂公亭記每以得道自任而
排斥釋氏至老不衰將卒數日不食惟覽太平廣記
神仙事跡且曰蓬萊方丈吾其歸乎卒年七十三累
官朝議大夫

人物志

按李觀府志載宜春人分宜舊志士安傳列城西

人觀與士安爲父子兩說互異姑存竝攷

彭持字知權漳源人少喜學西漢文爲諸生時知軍州
事張禹稀簡接士求見者先令賦詩方得通士無敢
進者持奮曰是謂秦無人矣因入謁禹令作日新之
謂盛德賦藏器待用詩皆立就張大稱賞貢入大學
與臨江孔武仲齊名擢進士甲科元豐間累遷至司
農丞出爲監司號霹靂手終奉議郎江西提舉祀鄉

賢

通志

梁公价字寶臣梁坊人少孤力學熙寧中進士調贛縣
簿稍遷承信郎守四門博士

前志

歐陽中立防里人初試部郎上書言新法不便以司馬
光門人坐元祐黨籍廢卒弟子私謚節孝先生

前志

沈莊可宣和間進士知錢塘縣嗜菊庭植常數百本晚
年退居益放情於菊後以九月九日死朱子哭之詩
曰愛菊平生不愛錢此君原是菊花仙正當地下修
文日恰值人間落帽天生與唐詩同一脉死隨陶逕
葬千年如今忍向西郊哭東野無兒更可憐祀鄉賢
人物志

李師愈字夢授宣和進士調永新簿再遷貴池丞皆不
赴匾其堂曰見一取林下見一人之意有集十五卷

嘉靖志

歐陽椿字永年防里人本廬陵歐陽修族紹興中進士

瑞金主簿稍遷至道州判官改判臨江軍轉儒林郎

永州教授進通直郎賜緋魚服未老以奉議郎致仕

蕭散林泉號宜林老人有自修集軼祀鄉賢

通志

孫汲字公善寄籍臨江應舉授朝散郎監司知其才檄

權吉州吉素號煩劇汲居不越月境內稱治時黃庭

堅爲太和令作詩送之曰宜春別駕鄉大人來假廬

陵二千石祀鄉賢

人物志

孫億字延齡擢進士第知吉州永新縣吉民歲市縑六

萬餘匹主外計者收帑錢以供他費給鹽以賞織直億發其弊吉租歲收四十萬斛漕臣意在聚斂億預戒庾吏定收什二以充羨餘守州約拒臺命出納一用倉式徒知白州卒邀贈葬余靖爲誌其墓祀鄉賢

通志

傅公謀善文章常作小詞曰草草三間屋愛竹旋添栽碧紗窻戶眼前都是翠雲堆一月山翁高卧踏雪水村清冷木落遠山開惟有平安竹留得伴寒梅家童開門看有誰來客來一笑清話煮茗更添盃有酒只愁無客有客又愁無酒酒熟且徘徊明日人間事天自有安排其詞清雅曠達抗世離塵可想見其人風度又與邑令許及之詩并無遮傍語皆調笑可誦集不傳於世

舊志

易充字正翁號中州唐狀元重之後幼聰敏拔羣年十六七博通易詩書號三經處士教授鄉間遠近從學者甚衆所著有中州文集祀鄉賢

通志

趙若燭字竹逸城內人景定中進士知光澤縣子嗣城博通經史宋亡不仕立教於鄉及其門者衆所著有詩經箋註名曰籛通祀鄉賢

通志

按若燭通志列元人物誤今更正

元

趙榮字榮甫城內人由史學發身仕至朝議大夫萍鄉州知州致仕子彥文以賢才徵知閩縣事

人物志

歐陽元字原功號圭齋其先本邑南防里人祖遷瀏陽元魁湖廣鄉貢進士及第歷官翰林學士承旨封楚國公贈大司徒文章道德師表當世所著有圭齋文集祀鄉賢

人物志

彭應雷字震卿漳溪人延祐間舉儒士授南寧路判官稍遷蘭谿州同知有清白聲擢知象州以奉訓大夫

安福州知州致仕祀鄉賢

通志

歐陽自強字南翁防里人延祐間科目盛行再試鄉舉不愜卽幡然息進取志以著述教授自任爲文明白純粹扶持道教族弟元嘗以處士薦弗就年六十始從太守張子元之聘爲郡學師課諸生以孝弟力行爲本更故宅建樓曰意山揭後斯記學者稱意山先生所著有周易說約春秋辨正朔尚書閩法詳說等書皆發前儒所未發子貞別有傳

府志

彭繼凱漳溪人至正末歐普祥陷袁州繼凱募義勇起豐樂鄉迎戰大破之會安福義士袁明東等亦引兵來賊退走州遂反正乃下令禁殺掠修城池繕甲兵

弔死恤孤民賴以安迎舊守寶童歸嫉其功令刺客

殺之

明一統志

李明造一名明遠字鏡初檀溪人元祐間由袁過吉訪歐陽氏道經安原見山水環繞風俗淳厚流連不忍去遂奔父喪葬高峯下廬墓三年墓側生連理枝每朔望有白鹿遶墳之異事聞於朝賜號純孝處士有文集二十卷陳晉公爲之序

詳新喻縣志

明

劉仲質字文質西礪國人洪武初爲宜春縣訓導被薦入京奏對稱旨擢翰林典籍奉命校正春秋本末十五年拜禮部尙書帝以天下郡縣並建孔子廟而祀止京師典禮未備命仲質議之仲質乃與儒臣奏定釋奠禮儀頒行天下學校每歲春秋仲月通祀孔子如儀時國子學新成帝將行釋菜侍臣有言孔子雖聖人臣也禮宜一奠再拜帝曰孔子明道德以教後世其可以職位論耶昔周太祖如孔子廟將拜左右曰孔子陪臣不宜拜周太祖曰孔子百世帝王之師何敢不拜遂再拜今朕有天下敬禮百神於先師禮宜加尊崇乃命仲質詳議仲質請帝服皮弁執圭詣先師位前再拜獻爵又再拜退易服乃詣彞倫堂命講

庶典禮隆重稱陛下之意詔曰可又立學規十二條合欽定九條頒賜師生又奉命頒劉向說苑新序於天下學校令生員講讀是年冬改華蓋殿大學士帝親製詔文賜之坐事貶御史後以年老致仕仲質爲人厚重篤實博通經史文體典確不尙浮藻帝嘗留意焉祀鄉賢

明史藁

歐陽貞字元春防里人從學士揭傒斯鄉進士夏鎮學工古文元季不仕洪武初以易經魁江西鄉試授考城主簿改扶溝以老歸後登洪武十八年丁顯榜進士所著有周易問辨三十卷史提鈎七十卷餘學初

集龍江叢稿東齋寓錄貧樂集自號石戶農祀鄉賢
人物志

袁天啟挺秀鄉紐村人元末歐祥陷袁州天啟集民兵禦之不克祥怒屠其鄉天啟匿江灣柳下獲免洪武初舉儒士授本縣儒學訓導祀鄉賢

安志

黃子澄名湜以字行澧源人洪武十八年會試第一由編修進修撰伴讀東宮累遷太常寺鄉惠帝爲皇太孫時嘗坐東角門謂子澄曰諸王尊屬擁重兵多不法奈何對曰諸王護衛兵纔足自守倘有變臨以六師其誰能支漢七國非不强卒抵亡滅大小强弱勢

不同而順逆之理異也太孫是其言比卽位命子澄兼翰林學士與齊泰同叅國政謂曰先生憶昔東角門之言乎子澄頓首曰不敢忘退而與泰謀泰欲先圖燕子澄曰不然周齊湘代岷諸王在先帝時尚多不法削之有名今欲問罪宜先周周王燕之母弟削周是剪燕手足也謀定明日入白帝會有言周王櫛不法者遂命李景隆率兵襲執之詞連相代諸府於是廢櫛及岷王梗爲庶人幽代王桂於大同囚齊王樽於京師湘王柏自焚死下燕議周王罪燕王上書申救帝覽書惻然謂事宜且止子澄與泰爭之未決出相語曰今事勢如此安可不斷明日又人言曰今所慮者獨燕王耳宜因其病而襲之帝猶豫曰朕卽位未久連黜諸王今又削燕何以自解於天下子澄對曰先人者制人毋爲人制帝曰燕王智勇善用兵雖病恐猝難圖乃止於是命都督宋忠調緣邊官軍屯開平選燕府護衛精壯隸忠麾下名護衛胡琦指揮關童等入京以弱燕復調北平左右衛官軍分駐彰德順德都督徐凱練兵臨清耿瓛練兵山海關以控制北平皆泰子澄謀也時燕王憂懼以三子皆在京師稱病篤乞三子歸泰欲遂收之子澄曰不若遣

歸示彼不疑乃可襲而取也竟遣還未幾燕師起王
泣示將吏曰陷害諸王非由天子意乃奸臣齊泰子
澄所爲也始帝信任子澄與泰驟事削藩兩人本書
生兵事非其所長當耿炳文之敗也子澄謂勝敗常
事不足慮因薦曹國公李景隆可大任帝遂以景隆
代炳文而景隆亦無能爲遂敗於鄭村壩白溝河喪
失軍輜士馬數十萬已又敗於濟南城下帝急召景
隆還赦不誅子澄慟哭請正其罪帝不聽子澄拊膺
曰大事去矣薦景隆誤國萬死不足贖罪及燕兵漸
南與齊泰同謫外密令募兵子澄微服由太湖至蘇
州與知府姚善倡義勤王善上言子澄才足捍難不
宜棄間遠以快敵人帝復召子澄未至而京城陷欲
與善航海乞兵善不可乃就嘉興楊任謀舉事爲人
告俱被執子澄至成祖親詰之抗辨不屈磔死族人
無少長皆斬姍黨悉戍邊一子變姓名爲田經遇赦
家湖廣咸寧至正德中進士黃表其後云楊任洪武
中由人才起家歷官袁州知府時致仕匿子澄於家
亦磔死二子禮益俱斬親屬戍邊後太常祀鄉賢明史
按明太常卿黃子澄靖難之禍株連十族異姓致
命者五十四人其臨危勁節類皆皦皦可泣鬼神

然事久而軼者夥矣徵文考獻畧散見於他書焉
趙子昇城內人爲子澄姑壻早世無子及難作逮其兄
孟昇弟蘇州巡檢仲昇並置於法

袁子良小北門車田人子澄姊壻良旣就拘其子彥鼎
彥輝彥溫俱在緝中良姪彥英素孝友尤任義俠見
子良合門被戮懼覆厥宗泣請彥溫逃匿星塘冒頂
軍戶自以其身出代被誅同時袁氏懿貞子良女亦
代兄死事詳列女

郭汗杰南岸人子澄受業師年八十歲禍延日子邑庠
生子敬不忍老父受刑願以身代弗許遂併見殺

按文皇執方孝孺至詰之曰將誅爾九族孝孺厲
對云便十族奈何後併坐子澄十族郭氏之及以
此此外見聞異詞亦弗深考要之慷慨捐軀其致
一也

黃伯奇江夏人資性純篤雅尚義禮洪武中舉才行老
成授金華知府蒞政嚴謹吏服其能祀鄉賢

明一統志

黃潤字彥清子澄子也年十餘能通論語尚書好讀左
氏傳西漢書夜分不寐帳中恒有光一日同兄彥修
從父子澄謁皇太孫候於殿外遇解學士縉至令對
偶曰兩位黃生玉潤齊齊入侍黃屏修清應曰一名

大老縉紳肅肅進班大內父叱之毋得稱長者之名
曰此解公字也曰小子何由知之歷問滿朝名字無
不知者復對曰萬年赤帝金城奕奕來朝赤烏縉大
奇之因以言之於上命皆爲國子生兄玉素患腹疾
每試多不與潤必奮厲在優等會北兵起潤年二十
七上萬言疏上嘉納之命爲五經博士持方畧謁齊
尚書秦咨薦駙馬梅殷軍督鎮淮楊北爲之阻道得
請以翰林博士兼提督常著用世畧海上紀部下數
千人用命拒卽位詔圖興復護駕南遜上建文尊號
兵力不支殿而死之生於洪武甲寅至洪熙元年附
葬馬鞍山陽遺入子皆幼夫人顧氏亦被難兄彥修
爲之撫養成立者三人曰鉉鎬鑄會分寧伯仲子洋
輩脫繫散居海上黃溪浦皆其後云

前志

嚴孟衡字衡中介橋人永樂乙未進士授山西道監察
御史衡形貌魁碩稟心峻潔爲御史正色立朝屢疏
大臣不法百司憚其風采陞浙江按察司副使蒞任
之先夕胥吏不戒於火案牘燬在事蚤緣規避衡身
自引辜受罰運輒逾年有白其枉者赦令復職時法
網稍密衡悉心平反至一牘中理冤濫數十人遷四
川右布政使凡三年卒於官輿櫬歸舟無行李涉江

風盪鼻道傍巨石鎮舟石卒委棄新喻路左土人用
築蹊坎猶呼爲布政石好事者銘其上有扁舟羽駛
是作滿羸沛淮仗信庸蜀著清之句祀四川名宦府
縣鄉賢五子析產各止田十二畝有奇長子璉贈少
傅叔子瑛魁成化丁酉鄉試任四川犍爲教諭先耕
隣人田赴試時猶秉鋤收芋田水里人至今傳之人志

趙杞材城東人幼穎悟超羣受業梁石門先生徧究六
經之旨建文壬午詔遴選學識優長者入成均先生
以邑諸生貢大學選授湖廣長沙校官永樂壬辰丁
外艱歸里旋丁內艱服闋補四川什邡司訓居職教
育有方人材輩起兩邑人士爭道之任滿考績天官
稱最擢翰林院檢討力求退休不允乃以詩上揚東
里少傅有老去思鄉井歸心寄故園句少傅知不可
留乃請於朝予告歸里別構一室彈琴灌花馳騁翰
墨自娛爲文古雅宕逸邑之碑銘序記多出其手有
止菴集行世邑侯何澄贈以匾曰理學名儒卒祀鄉
賢

歐陽汶字伯魯防里人宣德間舉經明行修授開封訓
導持正不受士贄值黃河水溢壞廟學聖賢像捐已

分宜縣志 卷二十一 人物
貲新之改永康邑人童睦失藏金至父子相惡汶爲
解白且成就其學遂以科目發身購民地創尊經閣
修永康志改國子學錄大監汪直鈎距傷人汶爲上
書力辨遷周藩長史輸所賜庄田子粒濟軍匠食汶
陽王縱肆啟國主申祖訓之禁却其饋多金人有歐
三清之目復改伊府右長史王妃子患疽妃父引遊
僧進因針炙薨王笞妃父撻遊僧且死汶舉祖訓諫
王爲賦詩志悔致仕家居嘗舉郡邑秋夏二稅過重
請比例隣邑奏減知府董竟如所請入奏所著有介
軒文集祀鄉賢

參府志及
行狀

袁象賢號啟菴小北門車田人資性穎悟初治詩後改
禮記中永樂丁酉舉人官刑部主事叅決疑獄多所
平反同察咸服其才因父庠生彥明母梁氏年俱高
乞終養錦衣娛親里邨榮之家居杜門惟日手一卷
衍爲庭訓子正恭正理正達並邑諸生能文有聲以
壽考終都諫劉蓋銘其墓

李雲雙源人壬辰進士授浙江海鹽縣令廉明方正興
學校均差徭所治多惠政士民德之任滿擢陞河南
道監察御史以年老致仕怡情山水著有雙峯詩集
問世長子公信別有傳次公儀選貢任湖廣宜章知

歐陽誠字應遠防里人孝友端誠博學善考據談古今事歷歷如掌以貢入國子中嘉靖辛卯順天鄉試授湖廣景陵知縣未赴任卒 嘉靖志

李公信雲子公儀兄貢爲國子生授襄陽衛經歷東安知縣廣州府通判清苦自持所至有聲致仕歸卒兩任俱祀名宦 嘉靖志

李香箬溪人正德辛巳進士初授工部主事抽分徐州值歲荒捐俸賑窮瘞死轉刑部郎尋擢廣東兵備道綏靖蠻寇朝廷褒之補任山西受命勘邊深入撫勦

歷陞四川巡撫都御史大理正卿引疾致仕清恬端莊宦轍所經靡不服其公廉家居敦尚孝友捐橐贍族修葺學宮卒祀鄉賢長子慶餘亦篤孝友 人物志

易鸞字鳴和城內人幼聰穎能詩正德十五年奉文建太常忠臣祠鸞自呈願以已地立祠助修登嘉靖癸未進士授和州知州下車手較權量使民畫一時有易公秤斗之號政善民安修和州志皆出鸞自撰陞刑部郎奉差審錄年三十八卒祀鄉賢子宏器嘉靖丙午鄉試第一家居清澹博古善文未仕卒 人物志

袁怡號西園小北門車田人嘉靖二年貢入國學授廣

東高州府推官居官廉明才能敏決案無留牘有古
廷尉持平風蒞任二載引疾乞休撫按堅留請益力
知志不可挽命電白縣以鼓樂彩亭榮其行去之日
郡人供張祖道怡涕泣謝之立專祠後崇祀名宦居
鄉好獎勵人才里人德之卒祀本邑鄉賢著有見一
庄文集子應樞由工部郎中歷任廣東布政司叅議
縣志

彭鳳號夢瀑西岡人嘉靖乙未進士選庶吉士授編修
以名節自持冊封岷藩却諸餽遺甲辰會試充同考
官時相欲徇所私鳳峻拒不納撒棘後有撫拾科場

之弊者波及鳳竟用罷歸家居分俸贖族割田供祀
敦行孝弟嘗引呂氏藍田約叅酌成編講家約一年
四舉西岡彭氏家法遂冠一邑著有一休堂稿祀鄉
賢季子士兆選貢生亦以博學孝友稱前志

趙錦城內人少負逸才未三十厭逐隊諸生中棄去養
親耽於詩翰年八十五郡守季舉鄉飲賓不赴錦賦
七律以謝有賢侯有意求遺佚博士將函及老農之
句又萬年橋詩云鈴岫雨餘橫玉竦清源春漲起蒼
龍其丰度可想祀鄉賢參舊縣志

趙濂城內人錦之子也幼習庭訓工詩文弱冠膺選貢

授石埭令累遷惠州郡丞所至有惠政事親以孝聞
 撫姪如子處族里昆弟恤孤賑貧好引進後學邑人
 稱為東谷先生年九十五卒所著有丙餘錄歸田稿
 寄適集若干卷藏於家子伯冠亦工古文詩詞以貢
 官大理推官有治行甫遷養利守卒所著有行寓錄

滇中稿等書 人物志參
舊縣志

張允中字堯卿號柳沙西關人為人端方讀書淹洽最
 嗜金鑑錄文亦師事之由是知名試輒冠軍嘉靖壬
 子舉於鄉授始興知縣賢聲蔚起調任英德有惠政
 陞長沙通判尋遷本郡府丞奏最上考致仕歸杜門
 吟咏自娛汲引後學每以器識為先孝友為訓祀鄉
 賢

趙炳旭字晉之城內人少遊黌序嫻於詩文為人具至
 性溫厚正直邑中興廢多所折衷父伯冠任養利卒
 於官大父濂以惠州同知致仕家居娛情詩酒喜賓
 朋座客常滿炳旭左右其間承順意旨一無所拂歷
 四十餘年如一日別駕許廉得其行誼舉順孫後領
 歲薦卒孫鳴鏗亦以文行者以歲貢任廣永豐訓導
舊志參

宋希堯字淑中城內人性宕蕩和易下筆如注萬歷丁

丑進士初張四維受卷希堯文進呈第一已經開讀
 至傳臚時忽置二甲第一時江陵不丁母憂鄒爾瞻
 特疏叅劾希堯亦侃侃持論為所忌授刑部主政未
 幾稱病卧鈐岡越歲出補工部營繕司管京倉竹頭
 木屑必親以過瘁得病卒祀鄉賢鄒爾瞻有墓銘通志

嚴克忠號靖可介橋人天資英敏制藝秀爽試屢冠軍
 萬歷癸卯恩貢授温州府判溫瀕海地時多寇警適
 郡丞缺兼理戎政督司稅務飭卒時儲帖然安堵署
 永嘉樂二邑篆邑倉夫差苦條陳利病申請筦鑰出
 納俱司官吏無累民治行稱最致仕居家豐彩潛修
 暇日復理舊編析疑義著精旨一卷祀鄉賢子二俱

庠生次子堯淑學優性介孝友著聞孫雲栗雲臬俱
 庠生曾孫一輝歲貢訓導舊志

嚴堯臣字良卿號印洲介橋人性穎達博聞強記髫年
 餼於庠家貧好施與不以錙銖為念研究古今自成
 一家言足不履公門見邑中大利病則從公建白以
 孝友仁讓相先邑里隣族無間言十困棘闈舉明經
 卒長子雲京為名御史次子雲台歲貢舊志

彭士遠字利見西岡人萬歷癸酉鄉舉初受廣西賓州
 知州移河池州州素患土孽士遠至恩威並著廉得

其渠魁地方寧謐興學拔子弟之秀者親督課開廩
餼士尋遷鳳陽同知以河功加俸卒於京祀鄉賢

通志參前志

嚴堯日號用汲介橋人選貢舉庚子順天鄉試讀書淹
貫詩文力追古大家善真草書署太和教諭合郡士
俱來學吉水劉同升臨川陳際泰並師資之大司馬
郭子章稱曰建學以來未有如先生者也吉水鄒元
標倡會講學堯日究晰性理鄒爲推服乙卯分校蜀
試壬戌鄒起都察院招爲幕屬力辭復署汾西卒生
平見義慷慨開分邑學門廛舍署泰和築廟建浮圖

署汾西建魁樓皆極力擔荷居家孝友所著有白華
館稿西昌雜草行世祀鄉賢孫一晁順治丁卯鄉薦
通志

李日新字欽謨城西人萬歷庚子鄉舉生而穎異淹通
經史爲文根據理要自期遠大登賢書後益閉戶遠
養居城西非公不至公庭甘清貧不事家產考定祖
墓置祭田以妥先靈屢戒族人曰吾家發源憲公以
子游刺袁州遂家州之白芒憲就養沒葬紅花仰囑
世世子孫歲加省視無以衆祖相推諉其敦本睦族
如此兄日華亦以文名由歲貢任吉安訓導講學課

藝門下多知名士

嚴堯雲字望卿號漢理介橋人堯日同母弟也性疏朗
立志節博雅善談名理屢試弗售以詩文自豪遍訪
知交遊金陵荆湘黔蜀吟咏成帙年垂九十

舊志

袁應梓車田人性恬淡鯁介不能脂韋居家寡言笑慎
行檢說詩書敦孝友雖爲諸生論高士者必首稱壯
應詔授儒官隱去屢舉鄉飲賓

舊志

李茂賓白芒人郡廩生當貢不就而隱其友人贈之詩
云羨君早挾風雲氣此日翻潛水竹居蕉鹿笑看塵
世夢魯魚閒較古人書俗無營擾關長閉客有過從

酒不虛清夜細繙高士傳孤山和靖恰相如人以爲

定論

舊志

黃灝號應川樓霞人生而穎異工詩文好義喜施里中
有不平事常求質其成晚怡情柳菊結廬楊橋之東

號柳中居士

舊志

彭大科號媿名西岡人萬歷丁酉鄉舉初知漢川縣縣
有河名劉家隔者巨鎮也商賈絡繹歲額派商稅八
百金協濟潞府以縣丞駐隔地徵收率以爲常癸丑
河闕舟楫不通而歲仍徵稅大科與邑紳周嘉謨議
請之大府列疏入告得允裁冗員罷隔稅調知廬江

有惠政陞北城兵馬司時權璫魏忠賢用事大科守正不阿左遷景東同知會璫敗擢工部營繕司主事

監督陵工官錢無所私歸卒祀鄉賢

人物志
參舊志

張承詔號篤棐泗下人萬歷乙未進士授蘇州推官廉

明風厲吏民畏服為立專祠遷禮部主事崇正戊辰

擢戶科歷工部都給事中果決敢言闢三朝要典劾

諸閣臣風裁謇諤有漢汲黯遺風庚午主考山東所

錄多名士陞太常少卿南太常卿通政使刑部左右

侍郎戊寅署尚書無何逆璫獄起始於鄧希詔造奸

梁四潛構成之事下三法司承詔與都御史鍾烱會

審力主正議按璫以法忽改命東廠王之心復審易

詞翻案承詔具疏確執前議忤旨閑住卒祀鄉賢子

士元孝友溫和丁內外艱以哀悼鬚髮盡白丁亥歲

大祲餓殍載塗元煮粥以賑全活者衆孫祖德亦舉

鄉試

通志

嚴堯武字定寰號文峰介橋人孟衡六世孫幼穎慧一

覽不再行文靈快簡易嘗與宋希堯肄業吉祥寺擬

對殿試策淋漓數千言俱根據性理舉萬歷乙卯鄉

試公車報罷怡情詩酒家故貧不屑治生產惟好聚

書貽後子七人俱蜚英泮壁凜庭訓也

嚴雲京字子初號志印介橋人萬歷乙卯鄉舉取經藝錄程崇正辛未授太湖教諭擢知平原縣令修城繕器除弊救荒戊寅以城守著績陞兵馬指揮御史楊仁愿給事中陰潤俱疏薦召對授御史屢有條奏薦黃道周楊廷麟姜曰廣劉同升等巡按河南兼監軍時汴圍越月京疾趨受事促諸鎮左良玉劉澤清許定國等進兵援汴圍稍解未幾賊復合京激勵諸鎮殲賊報効而諸鎮竟鼓譟引去值霖雨彌月平地成川賊決河灌城城沒而汴圍獲解京集舟數百編筏冒大浸營救宗籙吏民會上別遣監軍來代京乃歸杜門卻掃林居十七年惟地方利害慨然引陳年七十五卒祀鄉賢

通志

鍾烱字淑憲號昭明山泗人天啟壬戌進士授中書考

選戶科歷禮科都給事中縝密不妄言嘗以袁賦浮重又遼餉加派煩多約諸紳在朝者疏請割減卒以部議格未盡行庚午主試湖廣一時稱得人陞太常大理少卿順天府尹大理正卿吏工二部左右侍郎左都御史烱體貌魁梧器識沉練時謂公且大用以逆璫事與邑侍郎張承詔會審秉筆忤旨語具承詔傳中烱因回籍閑住林居十餘年罕談時事庚寅卒

祀鄉賢 通志

黃希憲原名金貴字雙南泗背人天啟乙丑進士知順德縣擢御史兩淮巡鹽時中貴用事額課不足特疏更綱釐政一新巡按甘肅約浮費飭將吏禦變有方畧遷太僕少卿應天巡撫三吳漕白二糧民苦已久希憲至力為請命海寇王尚忠蹂躪崇明各村落殲渠散脅吳松悉平晉秩河道總督兼兵工二部侍郎崇正末疏薦宣城應聘建言諸生沈壽民學行可大用為部議所格不報乙酉值姦黨用事誣以河工冒餉下詔獄會喪亂出亡遇盜殺於紹興江上 人物志

張兆觀號雲階西關人温厚嫻文辭三中副車舉明經通判邵武府鎮靜有政績擢守黔開州首建學校苗民始知書厥兵革而州以寧開州人於學旁立祠尸祝焉尋以補官道卒 前志

朱允恭字君培石坡人舉萬歷戊午鄉試授望江知縣臺司交薦時淮海彫殘恭以循良高等遷守海州焦勞拮据地方稍有起色會忤當事去任終知成都新津縣以慈惠著聲恭早失父而貧事母純孝撫弟弱齡至老不衰凡所入不以自私丁亥奇荒雖日不能再粥猶簡被衣鬻於市周親族之貧者其好義如此

祀鄉賢及忠孝祠 參人物志

張兆蘭字以綺西關人性豪逸強記能文崇正乙卯督學廣成侯峒曾拔第一辛巳選貢壬午廷試唱名禮部諸生皆跪伏兆蘭獨長揖宗伯奇之入大學鄉試報罷歸癸未冬憤張獻忠陷袁偽署官屬糾眾謀殺偽知縣龍方捷恢復邑城事覺為所執殺之萬年橋上始終無屈詞士林悲之祀鄉賢 人物志

張自新青竹人崇正間任京山縣尉有賊盤踞羅嶺自新統民兵往勦眾寡不敵竟為賊傷死之 通志

彭允中東岸人由貢生任石城訓導崇正壬午陞衡山教諭敦樸寡言動作合度邑人多以為迂癸未張獻忠陷衡山居民竄避允中與一老僕閉署端坐待賊比賊至破署門拽允中出欲降之不屈偽知縣夏雲謂之曰教官有何名節而倔僵如此允中曰惟為教官故不可降教官士子之師教官降何以表率士子雲慚怒嗾賊殺之崇祀衡山名宦嘉慶四年祀鄉賢忠義

李蕃東溪人由歲貢任福建建寧訓導陞湖廣南漳教諭捐俸倡修學宮攝縣事有富民萬霞者女字施某施驟貧霞欲毀盟訟於縣霞以三百金賄求判離蕃

佯受之次日堂訊呼霞責曰爾所以毀施某婚者爲
施貧耳今我贈金三百施氏子不貧矣事詳南漳縣
志崇祀南漳名宦祠

趙賡禹城內北府人明太僕寺少卿

皇清欽諡烈愍另有傳詳藝文

李宗聖泗下人縣廩生事繼母黃氏以孝聞母病衣不
解帶者四十餘日焚香籲天願以身代居喪哀毀邑
令江載清以聞巡按張嘉旌其間年五十偶遊田間
呼童具沸泉就浣浣畢更衣危坐而逝

舊志

嚴雲炫號元素介橋人父堯佐有隱德尤嚴庭訓炫負

資敏力學強記不隨時俛仰惟謹廉隅敦儉素崇正
乙卯拔貢署新昌學博訓勵多士一以質直相尚毫
無苛禮解組歸休優游林下卒年八十餘

舊志

袁以諒邑西下園人性孝友砥名節天啟歲貢任寧都
教諭陞武進令勤勞著績引年致仕

劉應祥施溪人崇正九年鄉飲被張獻忠賊兵執於路
自知不免懼覆其宗詭云家藏金帛當盡出以相從
賊蜂擁至家祥語其嫂具酒食相待陰囑其子令族
屬逃匿賊酒酣命出金帛偕之去乃罵曰吾義豈從
賊遂殺之其嫂亦以罵賊被殺

皇清

嚴雲台號心印介橋人博學有才望試輒首拔與兄志印有二難之稱爲人端凝和易足跡罕履公庭與人交不設城府遇鄉里緩急周濟不辭平生好訓勵後學沐其教者類多知名以明經終子槐楷樞樞孫開貽等俱郡邑廩諸生

舊志

張問明字日章西關人初失怙恃弱冠方就學勵志節丙寅以例貢任大名府魏縣值寇殘鄰邑抄掠城下單騎撫諭去以治河著功時督府盧嘉其能署叅永平軍戊寅己卯間大水丁亥奇荒煮粥施米全活甚

衆司理王延禔題其廬曰德門遺老祀鄉賢

人物志

趙鳴鈐字彥聲又字一驚號賡陽下趙人順治丙戌舉人其大父雷州倉大使名炳機父縣諸生壻初艱小試父督責甚嚴驅之樵牧輒匿書展玩不墜厥志後登賢書值丁亥奇荒買米散給活人無數爲上猶臨川教諭時率多士以禮義廉節督學王曰藻嘉其賢總督張朝璘巡撫蔡士英薦拔有學固留心朱陸文更上宗漢唐之語康熙甲寅陞廣平知縣致仕杜絕世事惟開導後學生平嗜學好善事父母孝敬不衰處宗族鄉黨謙恭卑牧平易仁慈享年八十一歲子

淑孔歲貢生淑顏應貢而逝淑曾邑附生俱以文行著

張祖植字公庭泗下人歲貢生少聰穎克自奮勵淹洽能文爲人重氣誼敦善行不怠居家以孝友稱司寇承詔子孫衆多植獨捐私不惑星歷忌諱營葬成禮任會昌訓導憐才樂育學中租稅悉以贈貧儒陞翰林院孔目

李一騶字景章號虞菴雙源人天性純篤明季鼎革盜賊劫掠鄉村虞菴方冲齡護其母遇賊請以身代辭氣哀懇賊兩釋之長受業於胞叔拔貢世芳爲文力追隆萬中順治丁酉舉人辛丑會副任廣東遂溪縣令十載任滿復署海康事所至廉明有聲以簿書勞瘁卒於官

宋廷珍字翼明城內人崇正間選縣丞

國初題授知縣未任順治十年袁郡請汰浮糧院司據實入告事下部核時需廉幹之人賫冊赴部廷珍奮力北行勦力任勞迄成事而還邑東江有鵝頸灘水石奇險約里餘往來每壞舟廷珍竭貲募匠櫃水鑿險舟行利賴丁亥奇荒倡義社施粥米平生不爽然諾不設畛域排難周急輕財好施有古人風

嚴雲會字子際介橋人篤學重行誼名著黨庠尤樂善喜施歲荒捐穀賑饑修橋道施棺藥汲汲如不及舉鄉飲正賓子一心字淑尹穎悟有才畧以文學例補國子生康熙丁巳征南將軍穆進勦湖南應徵入內幕叅贊戎畧事平授攸縣教諭招安郴衡餘黨投誠者千餘人在任修學校飭士習後以例格回籍子開昶令熒澤作官箴十七則貽之皆老於吏者之言也祀攸縣名宦父子俱祀鄉賢府志

李慶時字用我籍溪人博通經史一試弗售不復進取徜徉山水間妻弟大理丞吳三益延主西席贈金註

史選天啟七年授蘇州常熟縣黃泗浦巡檢急公奉法盜輯民安及致仕樂引後學散財發粟尤能以德綏鄉人云

朱允清石陂人知州允恭弟也爲人質直端方樂善好施丁亥奇荒碩穀價至五兩僵尸載道傾倉六百餘碩賑貸饑者近鄉遂無餓殍嘗以醫藥濟人雪夜叩之不惜徒步往視未嘗取貲直指董題獎賜冠帶晚年始舉子祚闕人以爲隱德之報叅舊志

張士達字伯允泗下人歲貢生學行卓越慨慷有伏波風丁亥大歉施粥占星閣見餓殍卽爲瘞葬邑人僉

稱爲佳公子

嚴雲渭三歲失父及長事母至孝事叔如父撫孤姪如子丁亥奇荒捐粟賑饑周急瘞死還金恤媪好善喜施不務豐殖惟課子力學長一礪次一礪俱以廩生名噪庠序司理王延禔縣令江載清等屢議鄉飲堅辭不受卒年八十有三子一礪一礪已未癸酉先後膺歲薦以母李氏年高不赴廷試恬退侍養兄弟杜門讀書不齒利祿母年九十終長孫開勲補邑庠曾孫宗黃宗宰俱增生宗定宗寬另有傳

彭萬祥字嘉正號菊隱章溪人順治庚子鄉舉爲人純

摯孝友同懷弟萬祺出繼家常不給屢推所有以應其他好義種德不求人知鄉里自相推服行文根柢經籍一本先正理法陶冶人才甚力所著有四書纂要易經衍義第三子騷號振齋幼失父事母能以色養兄弟相友愛嘗焚借券不責貧者償尤精舉業文名馳諸生中父子皆以文行著以子泗鰲任金谿教諭贈修職郎

李松生字棟吉城西人性醇篤嗜學康熙己酉鄉舉任大姚知縣捐修文廟培植士風姚邑鹽課最重松生爲繕鹽井減鹽耗馭苗民恩威並著地方利弊力

爲興除以勞瘁卒於官

嚴一桂字文軫介橋人御史雲京子讀書勵志節有匡濟才以恩貢考授中書侍父林居弗仕篤於內行弟姪早孤撫訓如子樂施與周族里貧乏丁亥奇荒捐粟煮賑全活甚衆邑有汰浮糧文田諸事皆力爲建白當事推重嘗毀家以紓族人之難子二開禧字集公開祐字嗣叔俱以文章孝友爲世稱任教諭潔已訓士所至克舉其職著有二難詩集開禧子宗塔附貢生端方正直慷慨多義行開祐子六登第者五以宗詰官知府兩世贈中憲大夫

府志

林嘉會字一維白水人邑增生幼齡失恃依祖母楊氏仁孝孺慕侍奉三十餘年尤謹事繼母氏黃曲得其歡心友愛異母弟嘉渤人無間言順治戊子鄉中斃一盜坐其弟以主名拘捕臨門黃氏仰天大慟嘉會曰誣吾弟並傷吾母將何以覩顏人世遂身當其難繫臨江獄中三年當道察其寃得釋康熙丁巳秋孫際元就試臨江試卷已錄而限於額其夜嘉會感夢於督學邵吳遠儒冠長揖自道姓氏里居及長孫文堪上進得際元卷嘉其古宕拔第一時瑞袁臨諸生環集名其子育蘭告以夢詢以平時衣冠舉止皆符

慨然嘆曰非其先人潛德蘊隆不至此親題善有餘

慶匾額行縣旌其門

參府縣志

黃瑞芝字九靈樓霞人由歲貢任東鄉訓導生平慷慨敦氣節積學能文守道施閭章引重之行部至縣必招芝講學賦詩居官造士有方羊城名士多出其門考滿赴京值滇警上書執事陳論侃侃多可採者所著有詩文集今軼

張嗣旭字熙甫西關人幼穎敏年十三餼郡庠肆力經

史古文從守道施愚山講學白鷺書院惟以反躬責

已爲要由歲薦授饒州府訓導隨材陶鑄深得士心

以疾卒於任所著有蘭舫集一鴻亭草子聯軫歲貢生苦志力學旁及諸子百家操履端方望而知爲獨行君子孫申堦亦歲貢生家貧嗜書精楷法恂恂儒雅有古人風

袁嘉縉字殿正車田人品端學邃與弟嘉紳有文名時稱二難衣冠言動造次必循矩矱康熙甲寅縉應歲薦弟紳已早逝矣紳子潔性剛正不苟隨流俗博通經籍屢空晏如顧躓於棘闈莫慰素志康熙丁酉就明經選年八十猶赴鄉闈

張嗣載字坤合西關人嗣旭弟謹厚篤實兄弟友愛無

間然爲文莊重有體以歲貢任安福訓導遷龍南教
諭課士有方七十歸休林下撫卷吟哦至老不倦卒
年八十四子聯昌郡廩生聯星邑附生聯珂別有傳
林育蘭字卉靈嘉會子也康熙間歲貢生平敦本任真
有讀書癖教授里中羣尊爲嚴師任宜黃訓導修

聖宮振學校課廸士子一以所教於家者施之年八
十引告歸宜黃人士爲刻半壁好音以誌不忘子五
並克紹前人德朱文端軾爲著孝友傳其文學尤著
者際陶字館山爲文務去陳言試屢冠諸生年四十
三卒際虞字賓麓癸酉鄉舉第二人性伉直有志當
世之務博通經史著禮記講義卒年五十二際元別
有傳

歐陽鐘字濟雲防里人學富今古一日可十餘藝而法
精理密才大不失於肆善麟經得其傳者輒高第由
廩生舉康熙二十六年鄉試赴春闈擬元卒不第人
咸惜之所著有清門塾課清門雜草行於世

嚴一沆字幼初介橋人康熙丁卯鄉舉品純學優以經
術自勵五上公車不第一意成就人才教授里中族
子開昶出其門下佩師訓爲名御史士大夫競以幣
招沆絕意干謁嘗佐邑尹周開緒合表忠祠建義學

工竣爲記其事從子開袞亦受學於沆循謹老成一
經外無他嗜好家酷貧以館穀治生善誘無疾言遽
色士樂從之遊由恩貢舉雍正乙卯鄉試二試禮闈
不第卒於京師

鄧宗璉字子範七都人歲貢任崇仁訓導持躬端謹有
師範崇邑學宮圯捐俸倡修文風日盛士頌德不衰
黃承元字師中樓霞人辛未歲貢幼繼世父埤順治丁
亥奇荒碩米至十餘兩承元贊襄其父將餘穀百餘
碩盡行賑貸生平不事生產家亦中落食蔬衣布終
其身爲人嚴正有學行卒年八十二康熙丙子鄉舉

正中其長子也學行亦如其父太守胡應麟延爲西
賓從不以私干家居好行其德年甫四十一而卒子
廷璧未弱冠廷琳年十二家徒壁立廷璧外奉髦祖
內事孀母下撫幼弟妹貧而有以自贍兄弟先後補
諸生食餼各以館穀事母母袁氏亦賢母也甘貧無
所俯仰廷璧江南塞北作遠遊每出不踰年歸省母
子兄弟之間極天倫之豫爲文力追嘉隆而不獲雋
卒年五十一兩世俱贈文林郎新津縣知縣廷琳別
有傳

習廷獻字勉臣塘西人文章原本六經爲諸生十試冠

軍督學何棟延入幕衡文後以選拔遊雍魯司城瑗評其文有方孟旋楊維節風作詩自出機杼不襲人牙後語嘗曰生乎我朝卽爲我朝之詩何必凌唐駕宋耶家居以禮讓化其鄉遊其門者多知重器識而後文藝所著有內省草尋樂堂詩集四書解鑑論等篇以購書卒於江寧弟廷奏廷見匍匐二千里扶柩歸

黃抱奇字又常號松峯上松人幼奉庭訓勵志勤學貫穿百家所作詩文若夙構然典雅工切雖吉光片羽皆足膾炙藝林嘗推本太極圖說行爲啟蒙圖於五

性感動善惡源流之分各繪以形綴以韻語極明白簡要取便覽誦其教授里中隨材善誘一時能文之士多出其門登康熙丙子賢書任陝西洛川令甫下車廉得邑中舊有雇役錢司胥染指大爲民累力裁減之從前積弊釐剔殆盡尋引年告休以陶隱居自况署號松峯子有松國學生

嚴開祖字遠侯號曉亭介橋人康熙庚辰進士選知河南熒澤縣甫下車卽滅火耗之半以蘇民困報最行取授戶部主事歷員外郎陞禮部儀制司郎中乙未分校禮闈所得多知名彥擢江南道監察御史時甘

陝偏灾昶請裁漕二十餘萬以備荒歉母憂歸服除
補浙江道協理河南道事連上三疏一變銅劬採辦
一罷商賈馬匹一減蘇松浮糧銅劬馬匹二事旋奉
允行浮糧一疏格部議吳人猶喁喁感誦至並前周
沈况鍾稱爲三君子未竟所用而卒於官

府志

彭裁字汝斐西岡人康熙庚辰歲貢潛心學問有聲黌
序操履端慤動不渝繩尺當道欽其文行交延在義
塾訓迪有方不以私干政府

府志

郭廷輝字三英南岸人歲貢選授鄱陽訓導以老辭家

居多行義舉族孫永盛幼孤無期功親廷輝撫之飲

食教誨以至有成甫三十喪偶義不再娶知縣顧祖
雍詳請大中丞白潢採入通志年七十猶好讀書能
作蠅頭小字手抄大學衍義補四十餘帙卒年八十
長子達字子上康熙戊子副貢入監肄業揀選教諭
敦倫立品尤健於舉業爲文渾灑有先正風力其姑
氏適張乏嗣病劇達往省與以所積金固辭不受年
未五十卒著有文稿待梓長子師齊邑庠生亦有文
名季子師忠辛卯恩貢生

參府志

林際元字遇夫育蘭長子積學工詩文操行醇正寓端
鯁於渾厚中接引後進隨事裁成無遠近皆願炙其

光采當事重其名延致皆不赴里有以暮金請託者力拒之誨以禮讓一鄉多化服性尤純孝事繼母黃氏曲盡歡心母亦視之如已出羣從十餘人際元爲家督敦先人孝友素風一門和順詩禮之教爲通邑首稱年六十二以明經終所著有萊根詩草子五俱見鳴鶴傳中

蕭大遇字持簡介上人庠生質敏好學爲文洋洋灑灑下筆數千言事親以孝聞與弟姪合爨同居者四世治家嚴而有恩歲饑捐金賑貸更捐穀五百碩爲倡族黨感其意共捐二百碩歲分貧鄉之次貧極貧者有差不取息耗所居畧廬陵人有爭持簡以情排解皆歸於好人深服其盛德云

張天衢字帝升泗下人力學善屬文屢薦鄉闈應康熙甲午歲貢選大庾訓導以年老辭生平仁心爲質邑兩丁歲荒穀貴民饑衢率家人減常膳留餘以資賑貸當事推主賓筵弗就時同懷兄弟並躋耄耆遊處相從願身古貌衣冠甚偉觀者慶羨爲一門四老長孫逢吉佩服祖訓中康熙丁酉科武舉

趙逸顏字汶夫城內人孤介不借俗惟詩文若性命父官永豐訓導逸顏年十六欲往省家人阻之不從舟

次忽墜水已深入矣念得復出見父死無憾舟人引篙援之果得出人以為孝感易箒之夕戒二氏無得至門著有梅園錄子祓乾隆丙子鄉舉別有傳

張聯珂字介璜西關人嗣載子生平篤孝友力學砥行工吟咏雍正六年由拔貢教習選授零陵令邑蛟水大發漂沒數百家捐賑二千餘金全活甚衆攝祈陽篆決疑獄數大案以廉能調保靖苗疆甫下車革除陋規邑舊無城池前任估築土城珂詳請捐三年養廉改建石工邑諸營造經理皆裕如土司舊以民間男女為鄰疆饋物珂徧諭難民親屬呈報詳請關回

七百餘口俾完娶樂業廉得奸苗將謀猖獗密會鎮守擒渠魁立斃杖下衆苗畏之如神明編立保甲改十六旗為十六都各立社倉捐穀碩以為民倡設義學延師訓諸生捐給修金膏火詳定歲科弟子員額陞新興知州引

見赴任至常德卒著有坦園詩集子申基附貢生州同職事二親竭誠養志父聯珂性嚴毅稍不懌必長跽請罪俟霽乃起父宦遊隨侍左右務稱親志功服尊長遵父命為之謀安全弟姪為之受室他慷慨好義如此

嚴宗嘉字二猷號孚亭介橋人開祐次子康熙甲午鄉
舉署穀城咸寧二縣沔陽州事靖盜彌灾有能名實
授直隸高陽縣新學校輯邑乘梁猪龍河以易舟渡
人呼嚴公橋調玉田創義塾田課士邑有丈二窩上
接薊運河薊人謀毀舊堤紆已害以壑鄰監司已入
其議宗嘉力持不可爭之三年卒得直隸薊州牧改
延慶量移開州革除里書改造順庄冊按地徵賦歲
省里甲雜費數千金年六十餘卒於官爲人孝友肫
篤出於天性歷任繁劇賑水旱灾者七理軍需者二
應大差者十有七民皆陰受其德治獄仁恕嘗爲同
官曾鞠平反申二找子等一十七人所至每留去後
思司寇錢陳羣銘墓子三季秉璋幼慧年十八以古
學受知督學湯聘拔第一著有云云詩草甫弱冠先
卒

府志

林鳴鵠字慎占際元三子康熙癸巳鄉舉讀書矜氣節
剛直敢言郡邑中大興除多出其力爲文博通古今
剴切事理高安朱文端軾冢宰楊汝穀深引重之任
都昌教諭整飭士習蒸然日新陞建昌教授時太守
徐天麒與盱江書院課士引之爲助甄拔造就多爲
知名士鵠兄弟幼俱師伯兄鳴鶴鶴籍諸生有學行

偃蹇不遇鳴鴻歲貢生大守薄履清薦舉鴻博撫藩
兩試並置第一人爲人嚴重勇於行義邑學改建北
向鴻與邑紳及弟鷓鷯力主其事並服其公正林氏
累葉孝友鷓鷯晚年家居鷓鷯已先卒與兄鴻弟鷓鷯
老林泉年各七十餘鬚眉皓然鷓率羣從左右兩兄
之間極襟裾至愛作人經師五十年晚膺恩貢人以
爲不愧學校坊表

泰府志

傅尚行字次文城內人歲貢自奉儉約獨緩急人無難
色授長寧訓導好汲引後進有張鄧二生者邑書役
子也貧不能具脩脯資以膏火自督課後皆爲名諸

生

唐德義字宜臣雍正元年癸卯恩貢邑東北唐溪人幼
服庭訓力學篤行衣冠言動造次必於儒者性耿介
不稍希非分謙和之氣流溢眉宇間雖接待後輩見輒
長揖選大庾教諭弗就舉鄉飲正賓亦弗就高誼古
道粹然典型子綸孫師龍書香累葉食舊德也

宋式燕字用賓城內人康熙丁酉鄉舉事孀母愛敬純
篤積學勵行思發憤爲世用己酉鄉試應聘湖北截
取赴部學習志不甘小就歸南庄書齋益究心六經
之旨以苦讀成疾而卒

府志

歐陽徹字匹周防里人父光緝南城訓導以文行爲魯司成瑗所重著有充楚家課徹遵其教工吟詩補邑諸生幼事祖母卽能竭力代父勞嘗負之避兵荆莽中相保無恙專繼母氏伍委曲將順得其歡心兩兄先歿遺孤幼撫之如已出母頗有私蓄獨嘉徹孝養盡摯以畀之徹亦欣然從命迨母卒諸子成立乃涕泣告母靈三析之有欲舉其孝行上聞者曰君子愛人以德母以是增予痛也晚年閉戶授經專事吟咏以嫡孫御史瑾贈如其官

習教字繼志唐西人雍正癸卯都舉年十一失怙家貧

遵母氏教敦品讀書終身服伯兄恭之訓撫幼弟惠友于無間性坦易衣冠言動一率其真積學爲名孝廉壬子廣東同考官所得八人多知名士十上公車屢薦不第由明通授星子教諭上游稔其學行充白鹿洞監院院中佳士就質文藝開誠授以法度遠方遊學者踵至破格分俸給膏火後授寧德知縣繼前令築障海壩三年而後工竣闢良田民賴其利調繁惠安值頻歲告歉賦額多積逋敏權宜措注課完而民安堵及解官里居捐田奉祠祀賑貧恤乏多所全活內行質實稱其爲人年六十四卒

嚴宗喆字學聖號愚齋介橋人開祐三子雍正丁未會
魁長身豐髯風度嚴正授吏部文選司主事陞員外
郎門無私謁得好書舞文狀立白冢宰革之充己酉
廣西正考官號稱公明事竣擢永昌守禁革土司饋
送減關稅征額土夷歡服普洱逆苗之亂無敢犯境
丁內艱服除補衡州府剔弊除奸清積案五百餘件
闢石鼓書院與諸生講學郡屬有龍旺山明舊產鉛
奸商希院司意呈請採試遽聚眾洶洶宗喆立詣廠
封禁散其眾以專擅自劾歲荒發倉穀濟糶不待報
以失揭未賜令左遷江寧江防同知卒前後所歷多
要地以清節著聞平生好讀理學書切己體認作文
原本先正著有愚齋遺草

歐陽倩字肖曼防里人博通經史作文風發泉湧而法
度森然甲申饑出粟貸鄉人償不償勿問中雍正癸
卯副車邑令譚延主西席課子一領鄉薦一爲名進
士有子六四列膠庠第三子琴乾隆二十三年歲貢
胸次洒落善屬文尤敦行誼爲邑南名宿

楊師游字範淳逢塘人雍正癸卯選貢肄業成均揀發
廣西借補龍門司巡檢秩滿擢平樂知縣時宜山縣
白土苗民蠢動大兵進勦檄辦軍需審決俘囚千餘

人多原情矜釋以軍功調宜山邑境舊無麥游捐資
市麥種沿村散給自此宿麥連雲皆食其德丁內艱
服闋需次適武進縣缺人

特旨命往旋改婁縣婁豪橫詐財誘婦女人號獺皮師游
廉得其實重懲之邑頌為楊佛有四野歸心圖之獻
其卒也江西布政使王興吾銘其墓 府志

張祖煥字公祐癸卯歲貢泗下人侍郎承詔孫也嗜學
敦品有獨行君子風孝於所生服勞奉養必恭必誠
不肯假手臧獲同懷叔季早折曲為存祀晚歲分推
族長家範嚴肅孫世塾克繩祖武竭力祇事厥考厥

考年踰大耄世塾亦已周甲猶依依作孺子慕兄弟
五人友愛無死生間質性樸不苟隨流俗年十八餽
於郡庠試屢冠其軍應乾隆丙子歲貢

李逢遴字升聞沔溪牌坊內人雍正二年歲貢八齡失
恃繼母氏林頗難事遴委曲將順感而成慈居恒謹
身潔已不累世緣四壁蕭然一卷不能釋手父邑庠
生奠每以書慈目之其化導鄉人惟標先賢格言故
鮮有不率至訓課子姪凜若嚴師姪龍詔列明經科
子天詔孫鳴球鳴璫鳴璐並列膠庠

嚴一輝字光遠介橋人少失恃事繼母潘氏以孝聞父

太學生雲栗患痢家人傳染殆遍莫之近一輝獨朝夕侍奉彌月父卒哀毀異常時以未報生我之德爲恨比司鐸寧都遇

覃恩亟請貤贈以慰夙願任寧都時刻有梅江課藝

張天嘏字帝純城內人廩貢生爲人誠懇坦易無城府家固豐喜通財濟人緩急邑改建文廟竭力捐助授廬陵訓導日課士明倫堂敦古處摛文雅正沐其教者多有成卒於官舍以子世棟官同知贈奉政大夫

歐陽亮字堅載防里人幼穎異能文章爲名諸生試

傾其曹却廩餼弗食性孝友與弟欽讀書相砥礪常友愛如童子時事大母伍氏稱順孫能得父母歡心樂施予喜交遊父母歿喪葬一準家禮課子嚴明有法初以子瑾官部曹膺褒封年僅四十有六鏡時在京師里中同官皆榮之鏡曰榮不以封無忝茲封斯榮耳卽買舟歸布袍深衣以禮法訓其鄉人癸亥歲饑傾囊購穀以貸里黨而不責其償累贈通議大夫嚴宗墳字峻聲介橋人雍正己卯鄉舉墳幼慧年十五冠童子軍補邑諸生制舉及詩古文詞並工著作等身嚴氏自明方伯孟衡起家歷侍御雲京稱世族墳

兄弟六人而齒雁行爲家督處家皆有經緯延名師率諸弟治經先後五登甲乙科以功名顯塤以太守薄履青薦試博學鴻詞旋丁繼母憂未赴兄弟並善事繼母高氏其遺腹弟宗璧塤教誨成就尤篤一堂之上融融洩洩僉謂德星聚一門宗吉已酉鄉舉爲人渾穆無雕飾宗周邑諸生謹約持正以病不就鄉試宗嘉宗喆宗璧俱別有傳

黃汝茂字時育樓霞人雍正己酉鄉舉儀狀魁碩甘貧勵學揀發廣東試用授臨高邑篆更萬州所至以勤慎稱授仁化令興學校增義塾膳羞均平鹽價民尤

利賴之布衣蔬食不改寒素風凡二年卒於官

府志

嚴宗璧字泮英介橋人開祐季子爲人豁達有大畧忠孝天植生而孤自爲童時卽感泣矜奮敬服諸兄之教力學砥行逾弱冠登雍正己酉科鄉舉選知四川長壽縣戢匪安良興學勸士邑有白蓮教一案蔓引多人宗璧一無枉縱所矜釋保全尤多大府深器其能會大金川用兵委督大役赴軍營輓運盡瘁遘疾卧留熱龍關提督岳鍾琪慰遣暫還辭以軍旅方殷義不反顧卒以死勤事歿口外年僅四十餘

府志

黃宣中字殿元雍正己酉科武舉邑西樓霞人少失怙

事母以孝聞拚身礪名節細行必飭與人樂易可親然稍弗順於理輒面斥之無怨詞族姓尤多所匡正處家豐儉適宜惟好施予里中緩急恃之本境翔龍橋將圯議建僉有難志宣中捐金首倡躬爲董役橋成往來德之

傅尚義涇江人由附監考授縣丞嗜學敦品好行其德康熙甲申歲饑尚義捐穀倡賑居恒秉禮範俗尤嚴庭訓子郡廩生紹巡能讀父書有弟紹遜寢疾度不起以藐孤託巡巡撫之踰己子雍正甲辰邑議改建學宮巡與協贊當事雅重巡迄無私謁

袁璉號天逸小北門車田人少爲諸生讀書務實學爲人公正嚴毅族里中有事多求質其平尤好施予急公嗜義康熙甲申歲歉施粥賑饑雍正丙午穀踴貴盡發倉粟貸貧民不足借官廩濟之嘗獨力建謝恩橋及新邑學首捐金助木訖學成多恃其力邑人士高其行誼自教諭劉斯組舉爲鄉飲賓辭不赴

張世棟字瞻雲號松亭邑西泗下人資穎悟貫穿百家言雅善屬文由廩生出力營田議敘膺保舉監督興平倉補常州海防同知兼督寶蘇局錢法諸所專司靡不次第釐舉負氣骯髒恥隨俗委蛇蒞常三載遽

解組歸居常任義俠好與人爲善初需次都門浙人錢清不諧於其鄉避寓京邸以文謁世棟奇之助之金入監旋捷北闈海防廳駐江陰署側有錢生者亦雋士家貧無力畢婚嫁世棟聞而贈之金與人感誦其他慷慨好施如是居家捐貲修祖祠置祭田有范文正之遺風弟世均篤於行誼士林推重

鍾學進字勉男觀光人爲人方嚴不甚治舉業喜爲韻語亦不事矜炫好愆息人爲善與鄉黨子弟言依於孝弟力田治族尤剛毅持正無所假借吉凶儀節折衷古禮屏僧道晚年蔣花治圃與父老優游頤養蕭然如古逸民卒年八十四子世珩邑諸生壯歲訓經自適其天與世無機心卒年七十餘德量如其父子孫膺貢選列庠序者近十人

袁淑騫字克言禮教坊人子鏗子也由附監考職縣丞先世自明嵩縣教諭袁傲至淑騫羣從子孫傳衍七世未析爨稱義門騫篤性天母黃氏患乳疽騫以獨子侍病累月不就臥室再從子梅緝皆弱冠不永其年遺孤芳與芹並撫教爲諸生芳母郭氏芹母李氏並以節著騫家素封而好禮所與交皆邑間人蓄藥餌濟親族平治橋梁道路累數百金無所惜子自樹

由拔貢任兩淮鹽運經歷守官和易不齷齪為俗吏
生平好義樂善如其父

夏侯隆字景山池塘人歲貢生安貧嗜學和氣薰人事
關名節輒堅確不回當事重其品誼爭以禮致之卒
未嘗有私干

彭即達字敏及漳源人由歲貢歷任南城廬陵訓導為
諸生時屢試高等為文揮洒如意不名一體而風格
自高教授里中多所成就及居官設教多士亦為傾
心嘗率廬陵人士改建學宮居家有質行兄弟相友
愛晚年宦成歸身居族長諄諄以敦睦勗子姪

張元瑾北溪人恩貢行文清真雅正不涉險僻詩亦饒
有廬陵風味所造就皆淹雅士修家廟置義田捐館
穀以為族人倡士林多之

周峻字宗聖醴溪人天資穎異文思敏捷家素貧淡薄
自甘任定南訓導衣冠樸素紳士稱為古先生孫大
猷少孤服祖訓舉丙子科孝廉司鐸鄱陽

張經字正邦邑南桃源人少失恃善承厥考歡工詩文
屢試高等尤工行草書法筆瓢屢空晏如也平時持
重寡言酒後興酣上下千古益徵學養之邃從遊者
皆知名士惜數奇以歲貢終

嚴宗定字友黃號得村介橋人學問淹貫爲古今詩文字皆力追先正屢試冠其曹膺戊申選貢會 詔行

保舉以知縣譚獻策薦分禮部儀制司學習親老乞任秦州新興場鹽大使性方直不能諧時三年解歸家徒壁立授徒著述自娛經指畫者多以文章科名顯所著有可繼錄負書草及四書文稿同懷弟宗寬字又吳少服伯兄宗定教積學爲古今文詩與宗定齊名遊歷吳楚閩粵間吟咏適志友教幕府耿介無所脂韋官師楊錫紱每以冷友稱之由歲貢授弋陽訓導陶甄多士爲人倫師表引年致仕著有學樂編

竹園文鈔

府志

任蟠字時遇橫坑人由歲貢任興安訓導素行篤實力學能文學使者屢褒其優行居官振飭士風嘗率多士修葺 文廟廊廡待人和易坦白後進樂從之尤精易撰著之數恒不欲以是自見人以爲有漢長者風

黃廷琳字崑山樓霞人父正中爲名孝廉琳早孤篤志力學家無宿舛晏如也歲薦後一遊都門而歸知縣楊宏綱重其學行延爲義塾師維持學校反正邑中大利害羣而不黨從弟邑廩生廷瑾刻苦讀書工詩

文立身行已務持大體子汝旦凜庭訓爲邑廩生汝
勗汝勉並邑諸生

嚴開昱字宏昭介橋人壬戌歲貢少孤侍祖母袁以色
養聞力學敦品屢空晏如從兄開昶官御史開昱隨
寓京邸權貴交相引重絕無脂韋逢迎態生平嚴氣
正性跬步必謹尤善振後學縣令楊王樟沈均安劉
純煒延主義塾士林矜式子宗珦歲貢生善讀父書
品敦金玉孫秉惇秉儔俱守先訓

趙廷楣字時坦城內人由歲貢任龍泉訓導幼孤依祖
母歐陽氏家貧侍養無缺甘旨讀書母氏燈帷背誦

琅琅母亦樂之壯以舌耕自給爲文一研墨而就多
以自然流動爲主作詩亦然晚年一官冷署吟哦自
適解組歸居白田別業天和頤養年近九十而終

嚴宗質字素文介橋人歲貢生幼穎悟年十五補郡諸
生爲文疏宕雋永每試列前茅存心忠厚處事寬平
尤篤厚根本父開宣病瘋癱宗質十年侍左右未嘗
稍懈旣丁父憂諸弟俱尚未冠質友愛中加防範皆
課之成立生平厭囂氛履跡不入城市卹患解紛扶
持名節有漢長者遺風子秉遇恩貢生秉迅邑諸生
皆能讀父書而秉迅嗜學工文年不竟其志士林惜

之

歐陽去佞防里人平度州牧光緒季子縉謫陝西時去
佞將受室潛然曰吾父遠羈異域吾何忍以家爲遂
襍被走長安侍父旅邸十餘年以勞瘁得疾卒訃聞
諸昆環泣欲前獨姪仁計諸父年高恐不耐寒暑淹
滯中途願兼程往代諸父念其肫摯允所請卽日就
道比至大父病篤仁侍床褥衣不解帶垂兩閱月已
而大父不起仁哀毀異常格間關扶二喪歸里中稱
孝子順孫萃於一門仁以子星官臨淄知縣贈文林
郎

張學鵬字飛漢長富人以歲貢任永興縣訓導改蓮花
廳時廳學新設諸典舉振飭有條爲文敏捷工吟咏
詩人多傳誦之

府志

黃郁李字仲芳邑北江東人郡庠生少失恃侍父躬溫
清撫兄遺孤師昌踰已子家頗給好行其德青竹魯
某舉家嗷嗷變房得十金攜以覓糴遺諸途泣而歸
幾不欲生或以告郁李使召之至與之銀如其數并
助給穀十碩家置學田資子孫膏火子孫後先蜚泮
璧雍正八年鄉飲介賓卒年九十

張尚錚字和音泗下人由例監考授州同職家素封好

行其德親族中有不足者貸以粟諸姪則以膏火佐其讀每歲舍藥施棺費數百金交遊多端人學士年六十六舉一子人以爲好義之報

袁汝璧字聯輝禮教坊人諸生袁芹子也乾隆辛酉選貢性無矜飾傲衣敗冠不爲恥嗜學多所漁獵學使趙大鯨試明經善其濂洛關閩論特拔之屢應科無所遇弗以屑意讀書賦詩自樂尤工五字詩多自道其甘苦閱歷之况其發見天屬者益悲愴幽咽不自勝卒年五十八所著有易堂詩文集先儒粹言

彭源宏字巨暎西岡人附貢生少失怙事祖父母以孝

聞爲人厚重簡默以禮自持好行其德有長者之稱

好讀書行善族中一應公務俱身爲倡率家本素封不屑屑家人生業常遊滇蜀間紀行賦詩俱有別趣李自謙字益階東溪人附貢生立身持已謹飭老成恒積穀三百碩以貸鄉鄰不取其息行之數十年迄無德色有羅某者迫於宿逋欲出妻以償自謙聞而贈之金如所應給數羅某夫婦克全鄉人僉稱自謙真長者雍正十年舉鄉飲正賓

黃汝明樓霞人天性醇厚尤篤友愛同懷弟汝卓由武科應丁未春闈試額滿列乙榜挑選發浙委署雲和

令奉文採買以米霉爛呈議鬻產賠補弗給汝明罄
已田二百餘畝出售代爲完項家計坐是蕭然迄無
悔怨課子其傑應選貢授官學教習補崇仁教諭陞
來賓知縣兩遇

覃恩得邀贈如例

鍾元錦字天孫山泗人邑諸生明都御史鍾价孫居心
渾厚植行端方事繼母孝謹無異所生服除猶哀雍
正間公舉鄉飲介賓鄉里稱爲長者卒年九十一

趙祓字時魁號南菴城內人乾隆丙子鄉舉歲貢生遜
顏第五子也母蕭氏遺腹生祓弱不好弄城居循循

如處子稍長讀父書如接庭訓觀手澤輒淚下事母
一本於誠貧而能養承歡之餘每雜舉古事以博色
笑侍病尤曲至居母喪三年飯粗糲不入臥室族黨
稱其孝苦次錄古孝子二百人各繫一詩借弔古以
紓已哀後試教職借補吉水訓導蕭然冷署攜其從
子飲食而教誨之一瓊自擁歌聲出金石修脯屑屑
弗計也嘗署臨川雩都教事門下士重其學品來問
字無虛日去任時祖道餞別者雲集素工詩兼善書
法卒年六十著有南菴詩鈔南菴新草藥欄集行世
子應達孫元吉乾隆甲寅同受知沈雲椒學使

袁維拔字振侯邑北禮堂人由邑庠生授漕運隨帮廉幹著績擢衛千總優卹運丁勤勞過瘁乞假旋里初家貧事厥父母能以力養材具敏練見義勇爲宦遊後杜門韜光惠周鄉里荒年穀踊出粟貸不取息甚或不責償最嚴庭訓尊師友四子並服教饒有父風李自拔字萃亭檀溪人附貢生爲人篤實謹飭幼失恃事繼母喻氏得其歡心一門羣從相友愛植學論文不事浮華嘗捐貲倡修普惠橋及他道路歲歉捐穀賑貸鄉人稱義行

夏侯煒字峻淑邑西王嘉山人少孤依節母氏任同懷

弟二俱齒齡仗煒家督煒性孝友善承母氏歡每念父早見背輒泣下沾襟煒日設奠哀號終其身罔攸斃年二十二妻李氏卒誓不再娶二弟成立析生產煒以肥美相推讓子曙受室後屏諸一切抱樸含醇類懷葛遺風惟接待名下士意致殷勤累日不爲疲倡族置學田鼓勵後進書香蔚然壽八十二而卒李發培字本植雙源人負販子也善事父母服勞奉養備至父卒煢煢依母母間出取蔬知必迎還盛夏燃驅蚊具代帳冬夜烘被旦烘衣行之數十年如一日有食以肉者輒懷歸鄰蕭氏高其行詣妻以女母壽

踰八旬卒過葬所必號泣蓋其孝行出於天性云

嚴思濬字叙揆號潛菴介橋人州牧宗嘉家孫乾隆丁丑會試第三人成進士爲人疏節濶目不立城府好讀書目下數行發爲詩古文頃刻千言筆不加點獨制舉藝營度不輕脫稿蔚然有經籍光大父宗嘉持清白作吏數十年思濬復繩祖武而天性質厚甲戌持祖服不上公車數遊幕府得館穀以養繼祖母父母旣官靈山培植士類興學校修文廟靈士不列科名十餘年庚寅大比遂有舉鄉試者

朝廷方征緬甸兩粵有辦馬之役思濬四處購買良馬

五十餘匹赴滇事集而民不擾及權歸善篆務值徵兵回閩過其境千餘人諸供應經畫裕如毫不累民制府撫軍交重之舉卓異正薦入

覲年四十七未竟其用而卒所著有潛菴詩鈔四書文稿

嚴思發邑廩生字景肇介溪人增生秉中子積學有素品行端方爲諸生拔列一等十三次選於易制藝精刻鄉試屢薦平生整飭風化敦行孝友於每月朔望日集鄉族於祠講鄉約督其力行課生徒師範森嚴引掖得法邑名士多出其門著有存拙文集及應貢

而歿年六十有五子升銳升曉薦升悅爲諸生
張逢吉字遇淑號竹亭泗水人性純孝尤爲大父天衢
所鍾愛中康熙丁酉武舉揀選衛廳後數年當就選
逢吉以奉侍重堂堅辭不赴家居終身孝養生歿盡
禮最工書畫龍偶一揮毫人得之如拱璧壽八十有
四目覩四世易箚時囑其孫耐葬祖塋俾相依地下
世人嘆曰是不以仕宦爲念而以天倫爲樂云

歐陽瑾號予石防里人舉雍正癸丑進士授兵部主政
時年二十五歲視部事識守卓然先是郵傳支給兵
曹郎率以減損常例錢省入度支爲能瑾謂覈核大

過則州縣不堪民間必受其害執不肯署紙尾坐是
鎊一級大通橋運官物至東便門外舍舟而陸向設
車戶三十六綱紀之官吏巧取自肥車戶負官錢有
至六七千金及萬金者瑾督運務立法拯之一年而
釋前負三千金官刑曹最久馭正外省命讞全活甚
衆嘗輯爲一書名曰欽恤成案在臺中章凡十餘上
皆深達大體洞究本末督學奉天攝府尹覈正宗學
釐定屬官人莫敢干以私署國子祭酒不以東修通
謁爲甲乙識拔多知名士由太常太理太僕寺卿晉
順天府尹其時適調東三省兵征金川會京師軍事

旁午瑾區畫裕如

上以是益重之擢總督倉場戶部左侍郎瑾故官倉場曹屬悉其間弊竇諸欲見之施行俄而以罣誤罷官意泊然也明年起內閣學士奉

命祭告河南湖廣陵寢嶽瀆禮成復

命遂致仕家居四載年七十有二而卒著有三才本說子六愛福建峽陽縣丞懽恪監生忻悟邑庠孫八躋拔貢嗣李歲貢曾孫九棠監生

張聯鳳字敬莊西關人爲人嚴毅公正不爽然諾居家醇謹專延名師課讀子五並克紹先業嘗佐邑令修

縣署公堂邑學官圯竭力捐助癸亥奇荒出穀賑濟全活甚衆年七十卒知縣林邦琬親題匾額曰古之遺愛三子申祐州吏目署山陰分縣乾隆庚子恭遇純皇帝南巡監督御道奉

旨獎賞加級以

覃恩得邀贈如例子孫應貢選列庠序者十餘人

歐陽欽號抑齋防里人年七十舉乾隆辛巳進士

殿試日羽林門卒呼爲老梁灝時

恩旨進士年七十俱用翰林欽獨不與乃就教授任南康會郡守將詳革某生父子欽請曰法宜寬去子留父

何如守不可竟詳之部駁如欽議守慚因中以他事解組去先是欽受知於金海注牲後督學安徽聘入幕至任西江聞欽家居因薦掌南安道源書院戴可亭蓮士兩相國皆出其門性友愛逍遙林下獨偕季弟鑑龐眉皓首尋童稚之歡年均八十餘而卒子三美珠皆邑庠

林有序字尚賢歲貢生際元次孫也幼慧記悟俱超習科舉文章卓然隆萬家法當道共以大器相期許因天屬不完僅兩就鄉闈不復圖進取惟慇懃督課諸子生平小心謹慎不苟言笑士林奉爲楷模年過甲而兩子大定大宏同科報捷繼而大宏成進士三子大完亦附於學壽踰八旬夫婦偕老孫曾羅列歲薦食餼遊庠者相繼閭里榮之

嚴秉玠號謹菴介橋人宗喆長子姿英敏負鴻博才旁涉天家歷數山經地志等書及壬遁奇式靈素琴瑟諸家學靡不精貫於詩古文字走筆立成輒推擅場遊京師藉甚當道兩薦北闈不售以貢職授縣丞分發雲南所至輒有名署賓州知州卒於任年四十有七惜未竟其用著有逸仙詩鈔天台侯嘉繡爲之序見鈔北五子詩集

嚴秉圭號抑亭介橋人諸生兩應鄉試被落隨父孚亭
官北直晉謁淳邸荷賜金命入成均試北闈卒不售
遂絕意進取性孝友事繼母梁宜人順待異母弟秉
珠篤撫孤姪思淫如已子居近郭足不至公庭然有
關鄉邑大利病則從公建議弗避嫌侍父遊宦三十
年囊無一金子思濬教授於鄉歲以束脩奉秉圭皆
散施宗族貧不舉火者嘗客章門遇故人建昌劉明
經落魄旅次脫衣裘贈之其俠如此思濬捷進士令
靈山秉圭就養時秉珠任江寧理問梁宜人在署圭
年已六十猶奔馳數千里外定省弗衰少穎悟長益
博學邑志九十餘年未暮乾隆丙申間衆舉圭爲纂
修搜殘補缺同事林有席歐陽星皆名進士心服其
才年七十有二卒

林有席字儒珍號平園鳴鶯長子承三世明經業孝友
一堂性肫篤無他嗜好讀書別有會心工經義力追
先正爲督學金德瑛賞識咨送豫章肄業是時陳文
恭宏謀撫江右閱其試卷尤刮目相待壬申成進士
謁選授東湖令東湖正宋歐陽文忠所治夔陵地也
初蒞任卽葺城垣疏溝渠復修廟學邑志治獄案無
留牘公退輒進士子嚴義利之辨以通經學古相勸

勉縣民建政通人和棹楔以誌感戴適丁內艱旋因公註誤邑紳郭江等為撰文廟碑記頌其德政歸家宦橐蕭然繼丁外艱居喪一準朱文端軾儀禮節畧矯枉扶衰獨為於舉世不為之日同懷弟三有廉有彥有廩先下世抱痛鴿原異於尋常生平有餘財必分潤親屬無德色仍仿許魯齋治生言授經遠近與生徒講學不倦閒時與宜春袁芳杏選袁陽文徵二集考墨卷一集名文有專稿多經論次嘗校定座主馮浩宋史節畧增刪濟州志聘修吉羈贛志及本邑志並請於譜法鄉隣多敦請裁定年六十二兩目

失明因以耳代目有詩文就質者即評定改削時從子大任司訓新吳遊其署卧榻醒寤拈題口占成文得數十首題曰七十偶作續選古文雅正十六卷

皇清古文雅正十六卷體例一倣蔡文勤世遠其增批蔡選原本均為當代名人許可又評選四書文百二十家五經俱有劄錄分讀考論辨解說為六門共若干卷自作雜著十六卷離騷經參解二卷古今體詩十二卷俱待梓至彙選鈴陽六子詩鈴陽詩徵所著高林詩鈔四書文上下二編已刊印行世平時訓子弟悉本陸象山家法子一大佐歲貢孫二為鐸為鈺並

諸生居鄉以禮化人舉族長遇鄭息違言必與平亭論者比之王彥方云享年九十有一

嚴秉璉號慕菴介橋人宗壁長子幼負奇姿經史子籍成誦日竟十餘卷年十三補弟子員爲學使于公器許旣長學益富聲望益隆由選貢聯捷成進士鄉試五策並

呈士林爭錄焉是時南昌彭芸楣名動京師號稱當世才見秉璉輒折服遂定深交彭醉後嘗語人曰嚴學尚精細我喜涉躐合二人而爲一當不惟西江獨步聞者信之初璉居父憂毀瘠廬墓人推古孝子持母服

亦然其居官也治青城新城賑荒災平鹽價卽忤上官弗介意林東湖平園所云資事父事君而敬同慕菴慕父母能至終身斯真能慕君而移孝作忠也可謂作郭有道碑無諛辭矣尤篤夫婦誼年三十喪偶不再娶勞無姬侍語具平園慕菴傳甚詳且悉所著投壺考切音正鵠天經地緯圖亥步寅賓諸書博奧淵微宿儒莫能究年七十卒孫翼邑增生

張尚銳字化成號慎齋優貢生泗水人廬陵訓導天嘏孫常州海防同知世棟子也奉先以孝持身以正敦友于博經史獎善恤患無遺力授進賢訓導檄署豐

城教諭丁內艱服闋改授南城訓導蒞任十二載苞苴不入兩膺卓薦皆力辭歸葦宗譜荆崙祠與弟三人敘天倫樂任進賢時何生母蕭氏孀而貧覬訪厥行實力爲

題請建坊又南城學署側程三家歲暮計窘欲出其妻哭聲達內署覬給以資完聚如故值歲歉必施粥某貧將鬻子爲徵券代贖其他隱德多類此惜才豐遇嗇棘闈五薦弗售享年七十一卒子文選附貢生文選監生孫宗儀宗儼森春俱從九曾孫敬之邑附生歐陽星號石溪防里人平度知州進士光緒曾孫家貧

力學習業山寺中危坐待旦閱月家人往視而襍猶未解遂得淹通經籍以文名乾隆己未成進士己巳北上道經東省夢漢齊相曹參曰子爲治當以清淨無爲處之比選得青州臨淄令淄故齊治也地瘠民貧星一以拊循爲意邑西萊田數百頃舊爲衛屯地屯廢供稅如故歲籤殷富者輸之民計蕭然星則別置一區募農墾植請大吏蠲其稅之半名曰順庄又疏二王窪古皇城等故渠悉成沃壤有王某者劇盜也數爲郡邑害星以計捕之置於法會壽光有鬪殺獄械囚十數皆不承臬司屬星往讞甫至於稠人中

指一囚曰彼色變而目動者是也一鞠而伏辛未
翠華南巡中丞檄縣令十餘督修

輦道他令多以資不給取助於民星領金止數千躬理
其役民無困者故淄人美其德政云清積獄囹圄幾
空勤撫字催科不擾政成而誦聲載道誠孚而疑訟
立剖皆紀實也淄淄四年改臨江教授又十餘載而
歸沒年八十二長孫敬嘉慶乙丑進士令連山

嚴秉琢號寅齋介橋人州牧宗嘉次子幼聰慧勤於學
志存經濟輕科目中書舍人新建裘翰周見而奇之
妻以女弱冠由儀徵舊江司陞江寧布政司理問制
府高公藩憲姚公交相推重諉兼護南北通判晉邳
州知州內艱起復會大兵征金川

上從阿大將軍請使往四川以知州用歷署松潘樂山理
繁劇皆裕如既解餉金川大營改用滇南護理普洱
知府兼署思茅同知修築城垣及征辦茶稅不爲民
累禮土司苞苴不入遠人帖服題補路南州知州遂
以料理九龍江軍務染瘴告病回里而歿惜未竟所
施云初宗嘉通籍後嘗捐百金助祠祀琢繼父志更
捐如其數置祭器定祭式先世祭典以舉年五十九
歲子三思濤思瀚俱國子生

歐陽亮號雪菴防里人與閣學瑾同族友愛甚篤家貧以孝聞中乾隆壬午副榜遊大學主瑾家彭芸楣姚雪門亟賞之爲延譽名公卿間長白傅公恒聘入幕公純公莪出其門後皆以顯仕著肄業旣滿就教諭南歸衆朝士欲保舉教習以母老辭遂歸卜築院背山牆東硯北逍遙自娛年七十餘歲卒子希哲孫懋皆諸生

李承培字篤材邑南檀溪人歲貢任大庾訓導爲人簡樸不尚聲華力學善屬文甫弱冠督學王思訓極加稱賞拔爲一郡翹楚後歲科試屢列超等戊午獲薦鄉闈以三藝稍短置之居官以課士爲務常捐俸倡修學宮栽培士林庾邑文風由此浸浸日上卒於官庾人有水流雲散人何在竹死梧枯鳳不來之句歸櫬時素衣滿城哭聲遍野戴篋圃先生贈以文

袁上巡字覲升國學生紐溪人素性敦行孝弟重然諾却驕吝爲人排難解紛言出罔不服其肫誠且不惜竭已橐以息其爭邑建尊經奎星兩閣捐貲勸輸慨任不辭尤好敬師延賓子姪肄業外塾身任爲東道主者廿餘載遠近就學之士欵洽迎送盡其儀子三長范金歲貢生孫宏燮中嘉慶戊午科鄉試曾孫大

霖邑附生

鍾定邦朝溪東山人由選貢中乾隆壬辰進士初蹟鄉闈氣不少挫益肆力於經史古文故學有根柢鴻臚袁芳松學士饒學曙咸推爲燕許鴻才及主政兵部讀律明體要司務無巨細必親決披牘恒至丙夜一時猾胥皆爲斂手時大司馬周璜爲定邦選拔座師深相引重每謂人曰鍾君遇事精詳謨畫多中此座終當屬之乙未分校禮闈所拔多名下士偶得他房遺卷謂有卧子才思百川理法力爭得薦揭曉爲新城黃高齡黃詣謝定邦拒弗見曰吾爲

國家得士奚謝恩私室爲高齡感其言卒爲循吏歷郎署二十年以俸深將保舉繁缺知府忽遭寒疾假歸至徐州道卒囊無餘蓄清風勁節人比之宋陳師道云著述多散軼僅制藝百餘首

林大定字正乾號健齋有序長子出繼胞伯有慶幼淳謹聰穎過人年十五背誦五經全傳學使深加器重乾隆乙酉以拔貢生與仲弟大宏同登鄉薦生平持身儉約存心忠厚前後教讀遊其門者多騰達有聲譽嗣選授信豐教諭一以敦品立學爲訓值歲歉饑民鼓噪公庭當事掣肘定謀諸在城紳士勸輸平糶

通商接濟民賴以安當道皆重其才學又以地方離
省寫遠應鄉闈者多缺費定倡舉賓興一會多士賴
以奮興旋陞贛州教授督課士子與在信豐時無異
未二載以病告歸攀留者相望於道卒年七十三
林大宏字副聲號實堂乾隆乙未進士大定仲弟也幼
時穎悟超羣通籍後京師諸名宿並以翰苑雄才目
之及

廷試遇而未遇當道挑取

武英殿行走以親老辭歸教授里門十餘年嗣起選籤掣

廣西維容縣缺初抵任見地瘠民貧思欲調劑而安

南邊境生事大宏外籌軍需內恤民隱斟酌盡善又
因水災相度地勢借帑築一長堤以後免至橫決調
署平南聽斷公平盜賊爲之斂跡縣前正對南門有
古馬頭局面開展爲文運所關歲久閉塞大宏徇邑
人士請力圖興復科第倍盛於前調署貴縣值西隆
內訌征車絡繹大宏仍前在維容時行之內外肅清
調任懷遠苗疆因俗爲治毫不擾民惟地多巖崿素
不產穀值歲歉有錢無市大宏札商隣邑販運流通
糧食併請於上官許權宜碾米全活甚衆縣治偏處
一洲四面皆水春夏盛漲城不沒者三板大宏捐廉

鳩工培築各溝居民安堵無恐身歷宦途近廿年四
與考校每至一邑摒擋公事外日與士子講論文藝
無異師生併纂修雒容縣志懷遠縣志若干卷晚年
致仕歸里身無長物惟以一編自隨所著有經史合
璧十二卷半閒詩鈔二卷

張世塾字敬修泗下人幼穎悟篤學砥行沉酣經史人
莫窺其涯涘旣冠附郡庠試輒高等生平渾厚質樸
藹然飲人以醇布衣蔬食風味自賞雖居近城市絕
無浮囂氣樂啟迪後學每談經禮不倦入鄉闈六
薦未售以歲貢終弟光世幼師之亦以歲貢終

彭泗鰲號沫亭邑南漳源人德性醇厚制藝精工中雍
正壬子科舉人九試春官不第留京師彭家屏延爲
西賓門下多掇高第選四川潼川府安岳縣知縣補
授撫州金谿教諭歷官十載致仕歸享年八十有六
孫大度郡廩生元孫啟昆舉人

馬士明字懋德田心人幼年失怙事母至孝攻舉業弱
冠補弟子員屢試高等與弟士華士昌號爲三馬乾
隆壬午鄉試房師李夢聰閱其文大加激賞呈薦擬
元主試稍爲塗乙房師力爭之輒忤遂置之李大痛
惜加評連牘至有難邀青目淚濕白袍之語兼精軒

岐術郡伯學師贈詩甚夥後以歲貢終

嚴升銳字念常介溪人思發長子幼穎悟甫冠卽蜚聲
贊序品學兼優孝友無間三十失妻誓不再娶讀書
外無他好杜門課子孫非除夕元旦弗輟購書無資
凡子孫讀本悉出手抄至老不倦屢薦未售膺乾隆
五十五年正貢年七十三子爲棟爲樑爲柱俱列膠
庠孫性善中式副榜曾孫效鯤效鵬爲邑諸生

周大猷字若昔號華亭醴磬人幼失怙承祖峻督課精
專中式乾隆丙子科鄉舉授鄱陽儒學庚子丁艱服
闋改授南昌府進賢縣儒學壽七旬致仕歸里主修
家乘著有家規祭條諸則諱訕子孫文藝古今體詩

成集享年八十六

李師夔字宣樂檀溪人贈登仕佐郎讀書善解博學能
文弱冠補弟子員幼失怙事母以孝逮事祖母得其
歡心待弟以友有延慶風勵節砥行果敢多能邑中
公事罔不盡力焉尤樂善好施戊申歲荒常捐金往
新喻買米百碩以濟貧困里鄙稱惠遇子甚嚴開室
之內肅若朝典訓以義方不減韓穆家法卒之日邑
侯龔果學師歐陽博席濬弔其廬子四長榮樵國學
生次兆楷季兆梓俱優附生三榮椿任今山東費縣

關陽巡檢同懷弟州同種德亦以孝友著四子兆梓
繼爲嗣

楊伯材號南坡逢塘人幼失恃侍父躬溫清尤能事繼
母伍氏內外無間言教姪日照早歲入泮得承厥考
歡生平苦學爲文力追天崇先正少應童子試邑侯
趙頤稱其文有老蘇風補邑諸生試輒傾其曹乾隆
辛未却廩餼弗食壬午擬鄉薦不售家無宿春授徒
著述里中尊爲嚴師嘗游岳麓浮洞庭濟沅湘探屈
景古蹟有紀游閒草賦性慤直剛正無所逢迎好接
引後學同里張申祿延主西席二十餘年課其三子

俱有聲賢序年七十八卒子曰忻邑庠曰燧國學今
張氏家塾猶奉祠木主歲時祭奠弗衰其感人如此
可以知其概矣

袁涵元字欲攀車田人性剛方果決由廩貢捐授訓導
以父老不仕其兄渾元官雲南家託涵及歸殷富比
封君諸姪皆知名士嘗出重金置一婢有隱疾卽還
之弗責所償或謂倩媒轉售可得直涵曰寧人欺我
勿我欺人縣邑諸興作涵至策之則羣力畢赴族有
佳城在淺灣勢者莫能葬涵葬前母夏侯氏衆皆首
肯其爲人敬畏復如此美鬚髯大聲音才雄而心細

每自詎曰使涵元得時治事不糊塗也卒阨於遇不獲如所欲子三福齡廩生壽齡副貢生著有小袁山房詩集行世松齡增貢生孫曾林立人伯人份俱邑庠

歐陽上泰號魯巖防里人父星乾隆己未進士尹臨淄上泰其季子也性明遠好深思秦漢之書關洛之微言力學而求踐之以廩貢候選訓導隱屏教授有犯泰者泰受而不爭人有爭泰必爲之剖論人亦服泰誠輒解羸於貲大布之衣粗糲之食以其餘救菑恤患歲戊戌大饑米直一石銀二兩每減直沽之力不能者亦貸之不責其償鄰有發婦家竒窘將棄子而去泰聞贈以金遂矢志守彭孺人疽發背泰禱祀願以身代及卒哀毀廬墓中濕氣遂不起年四十歲子三敬成進士官連山知縣啟澂皆監生

嚴秉瓏號純甫介橋人諸生工於文筆性溫厚正直少孤事母以孝聞母黃氏好施與瓏左右其間承順意旨無吝色撫孤姪恩禮殷切每語人曰吾見姪如見弟云試棘闈屢困畧弗介懷曰惟一卷岸幘胡床閣怡怡如也顏其齋曰怡園著有怡園存稿年七十五卒子思岱夢麟俱郡附生孫升偉邑廩生

嚴秉迪介橋人歲貢生邑增生宗賀長子幼服庭訓潛心學問爲文典雅工切屢試高等素善病遵行功過格雖一言一動無稍刻薄親族中有困乏者竭力以俸助之年五十登明經選堂兄恩貢秉遇淹貫經史詩文皆力追先正秉迪以師事之著有同堂文稿今秉迪長孫升朝次孫教俱列膠庠

張曰紳字廷颺歲貢生西關人性孝友敦實學勵實行正直自矢非飲射讀法公門無私謁設教環翠樓兼掌義學二十餘年諸子姪列膠庠貢成均皆所成就其門下士成名者百餘人士林咸推重之著有桂園

詩草

楊杏材號西園防里人性耿直家貧績學爲制藝出入經史力追先正壯歲肄業鹿洞書院山長郭祚熾稱其文靜細醇雅有楊澹餘風試輒高等屢薦弗售困於諸生漕院清江楊勤恪公薦諸南淮署入幕三月遂辭去遊歷吳越楚粵諸名境皆有詩以紀其勝及歸清貧如故授徒里中遵朱子白鹿洞書院遺規生平事親孝交友信介然自守不與俗浮沉嚴毅之操歷數十年如一日年五十五卒所著有西園詩草四書理解子曰桓曰燾孫體元皆庠生

歐陽上惠字濟寬防里人星姪家豐於財從子敬未成進士時多得其貲助嘗欲做古義田爲義學未就而疾作乃以百二十金屬諸子使商諸族歲厥事歐陽氏至今稱焉城邑鉅工若春暉橋白芒橋贊謀必力其歿也先數夕語家人曰某日吾將棄汝去叩其故不言及期果卒子枚教俱國學生

林大任守衡可號尹堂有席從子少孤從諸世父學資性敏達年弱冠以府試第一附郡庠越歲領鄉薦平日事寡母鍾氏孝養備至友愛弟妹尤篤居母喪與弟大伊飯粗糲三年不入卧內服闋赴會試薦而未售大挑二等選授奉新訓導以教官責甚重而稱職

難取重難二字顏其軒訓誨士子首重品行其以文藝相質者悉盡心裁成之邑下游舊建九天閣東爲岐嶺向有塔並傾圯大任以爲文運攸關捐廉倡修由此科名益盛至於振飭風化表彰實行尤不憚煩難如孝子鄧沐任烈婦王鄧氏均悉心採訪詳報請旌入祠嗣推陞饒州教授邑人士繪圖綴詩送其行蒞饒三載士林慶得人師由饒截選福建仙遊知縣甫抵任值大旱大任虔禱卽沛甘霖每訊獄不輕用刑而奸黠之徒皆自吐實情邑人有傾心共喜隨車雨

革面無須破柱雷之頌上憲特加器重擬調侯官晉江均辭未赴丁卯奉調入闈所取皆實學兩主司以名眼推之自司鐸迄爲宰官凡二十餘年所至皆卓卓有聲平時留心搜羅當代名家古文制藝郵寄世父有席評選近百餘家闡發幽光人感德焉卒年六十有二著有石廊山房詩稿

歐陽惇字克敦號秩齋防里人瑾猶子有雅才少好學博覽於書無所不窺能文尤工於詩白水林有席見輒奇之曰他日必大成家貧隨伯父瑾走京師以親老感毛遂捧檄之義就翰林院博士數年得授清流

縣鐵石磯巡檢抵任書所治廳事云此心常如鐵石吾輩自許清流足以見其志矣大軍征臺灣督兵餉東渡天風海濤鼓角悲壯霎時出沒數千里陰陽瀕洞莫辨東西如炊五斗米許吹泊師公澳曾爲詩紀其事名從軍泛海集有可憐一夜春帆掛飄泊東陽不見山之句又書事一首兵力何嘗解荷戈農家寸鐵各爭磨一時義憤天驅策兩地生靈日網羅書劍從軍悲薄宦鼓鼙竟夜起長歌黃華赤嵌君王地須掃鯨鯢靜海波旣渡海事竣返泉州遂卒於泉撫臣爲之奏得恤典乃克歸葬一子清業儒

嚴秉章號淇園介橋人宗賀次子由恩貢任安仁教諭
生平孝友性成博通經史制藝潤澤豐腴爲諸生時
屢冠其曹教授里中隨材善誘遊其門者皆以能文
著聲郡守名進士李允性曾延主講席及官安仁課
廸士子一以所教於家者施之見學宮漸圯捐俸倡
修併率首士紳矜赴鄉勸輸邑人感其誠篤踴躍應
之廟貌重新工竣邑人士爲立勤襄文事名額以誌
不忘時學憲汪重其學行保薦卓異堅辭弗就卒年
七十子淦廩貢任彭澤訓導思繡郡庠善讀父書惜
年不竟其志藩國學生孫升珪邑諸生

張尚禮字立範歲貢生泗水人家貧嗜學性篤彝倫年
甫十餘卽以館穀爲孝養計及親沒先世所遺微產
悉推與弟作婚配資已惟專於舉業友教四方功課
嚴密造就甚衆生平正直剛方不阿世好丙子甲午
兩閩房師力薦弗果售子二文榮歲貢生文焜丙子
舉人

趙璣字嗣衡號象園城內人家貧幼孤嘗奉母與弟就
耕東源里人敬信之遂成善俗恒憫弟作苦攜書代
牧一口執卷吟誦至暮牛逸火覓夜半乃得因嘆曰
士各有志安能長作牧豎爰私走外家隨李悅山先

生遊復受業安城王孝廉拔萃暨叔祖孝廉南菴先生并附課義學乾隆壬午冬楊明府初任課取第一後縣試卽置冠軍入泮次年食餼乃有問婚者至是始成室焉生平爲人謹慎每遇公事不辭勞瘁非公亦不至也庚戌歲貢就職訓導享年七十有六歲從學者亦多所造就子銓縣諸生

嚴升曉字瞻旭介溪人思發四子穎悟最高筆力超脫自幼卽與長兄升銳齊名生平存心正直喜維持學校整飭士習尤於天文地理考核精當膺嘉慶六年正貢著有四映堂制藝年六十五子爲榮孫從麟列

府縣學

鍾秉章字電合觀光人恩貢生自幼英姿卓犖弱冠補弟子員旋以首拔食廩餼爲文深入顯出法律謹嚴爲宗工大匠所器重惜數奇屢薦未售教授里中勤於課督一時知名士多出其門如邑孝廉黃崑圃親炙尤久家居敦倫紀崇孝友言笑不苟見者憚其威嚴享年七十有八子四長晟邑庠生餘皆克自振立不墜家風

彭城字寶連邑南東岸人幼失怙四壁蕭然依母氏甘藜粥度日賴兄均小經紀俾從師里塾年十二卽能

詩嘗從同侶釣池中有叮嚀莫釣池中鯉留待來春
好化龍之句素性恬淡爲諸生時恂恂自謹中甲寅
鄉試歷署撫州新城泰和教諭補上高訓導維持學
校獎勵士習爲邑所欽承年七十六解組歸家兩舉
鄉飲正賓以壽終子錦郡廩生試輒高等惜未竟其
其學

彭克聖漳源人例授州同廬陵學博卽達子醇謹溫厚
克世其家大節無虧常捐祭田修祖祠子昕諸生職
監生暄候選縣佐孫斌諸生

夏侯賡字廷玉歲貢生邑西圳頭人家極窘無立錫地
就傳數載父卽見背常負薪易米上奉慈母夜則擁
卷照讀於母氏織紵之旁漸覺有會遂自作制藝詩
古就正於鄉先生學業日進著有平山小草

楊曰鯤號滄石防里人乾隆庚戌進士授刑部奉天司
主事總辦秋審會丁內艱歸釋服補江蘇司員外郎
時開館纂修律例刑部堂官以曰鯤嫻吏治兼明法
律請

上命充總纂官陞本部郎中充律例館提調嘗手疏
大清律例及歷朝刑法志蒐集漢律一卷刻有
大清律纂修條例按語冊稿行世屢奉

命出讞大獄巡勘河工嘉慶丁卯科充四川副考官先是
湖北廉使陳公若霖外授

陞辭

上問刑部何人辦事若霖對李某楊某

上諭曰楊曰鯤朕知道的旋以俸滿截取繁缺知府引

見選授襄陽府知府襄陽爲荆豫七省要害經教匪之亂

餘孽未靖俗悍而健訟前守去積案百餘件曰鯤下

車從容判理月餘案無留牘所部有疑獄不敢上者

提其案立決之七屬頌神明焉甫二載卒於官曰鯤

幼而孤奉母至孝家素貧未嘗就外傳四書五經皆

母吳氏口授之早有文名戊申冬計偕雇一羸襍被

北上途間風裂面指僵直不得屈不以爲苦及其官

中外也前後數十年囊無宦資節減俸廉置田贍族

餘則以置書數萬卷每謂人曰吾不能以田宅貽子

孫惟誨之讀書俾有成立乃吾所以貽之也性嗜學

平生手不釋卷博覽綜核於古韻古尺考正極精凡

天下山川郡縣險易及導黃濟運之法尤素所講畫

所著有詩經經世輯覽古今韻學通叶紀聞若干卷

藏於家

歐陽躋號詣堂防里人瑾孫乾隆丁酉選貢時年二十

一
廷試京師過浙謁督學彭芸楣公賞其丰度叩所學大悅
之至京試事畢將就教習聞母召遄歸性樸厚善書
窮年弄筆衫袖烏彷彿與坡仙同好云年五十餘卒
子二

袁作梅字惟和歲貢生邑西江邊人生平渾樸正直孝
友性成爲鄉里所稱仰作文力追先正子從詔邑庠
生有聲早逝次從詒亦邑庠生

趙錫疇字冠南號壽田下趙人質敏好學博通經史尤
工於詩性揮灑不治生產家漸落晏如也就各宦衡
文聘持正秉公不苟取與品行端方人故皆敬而愛
之后回里授徒宜分諸邑從遊者多所造就屢赴棘
闈薦而弗售晚膺庚午

恩貢適值父邑庠生淳八秩壽期邑紳廣西懷遠知縣林
大宏贈有國恩家慶匾額享年六十歲

歐陽敬號心蘭防里人進士星孫年九歲補弟子員爲
文艷而多風旣長學益富剪紅刻翠琢玉雕瓊人或
見所作如聽新樂靡靡之音使各心醉又如身入萬
花谷目爲之眩轉也制藝亦然旣而規模儲中子作
論文四絕句亂頭粗服活水源源足以想其志舉嘉

慶乙卯會魁授連山知縣甫抵任中夜秉燭危坐恍
惚美婦人向榻而拜遂病語其家人曰上帝命我治
鄱湖水利胥役來相迎矣盛服而沒著有盤谷集聽
雨集種蕉山房集叶韻發明勾股發明諸書子一
黃其曾字希魯邑西樓霞人戊辰進士汝亮第三子事
父母能得歡心兩兄一弟友愛亦如童時幼穎異喜
讀書作文及長附諸生籍試輒高等學使者並相稱
許年踰六秩乃食餼家極貧以硯田作生涯接親友
退遜溫雅煦和之氣薰人眉宇遠近知其學有淵源
來乞誌銘傳贊者無不立應所輯有制藝詩草與雜
著數卷壽八十一始卒

胡星煥字步泉七都新澤人力學未售援例授職舉鄉
飲賓爲人醇謹剛方樂善好義家有餘粟恒減直以
糶歲歉尤減半辛巳奇荒困將罄率家人省膳散給
族隣人多德之常修橋梁置菑產捐祭田修家乘美
舉不一性純孝父年七十五奉養無懈病侍床側衣
不解帶母年九十五奉寢膳亦如之旣沒葬祭盡禮
歲時省墓垂老必身親妻萬氏舉案齊眉守鍾郝家
法四世一堂食指極繁不聞諍語子增齡甲子鄉舉
增元增文增榮增慶俱庠生增華業儒孫光第光鼎

同科府縣冠軍入泮邑侯曹人傑手書楹帖誌慶享年七十有六

蕭聲清字欽若莊頭人由例監授州同職事母以孝聞好義舉郡建試院分十二棚清獨豎一棚郡守鄭極嘉獎勒碑誌名以垂不朽凡壇廟橋梁道路多獨修有負金者久不償迫於他務家有童養媳將出之清聞知焚其券並給金使配合至戚有爭產構訟者清出已田排解之嘗製湯藥濟困厄夏設茶於路濟行人見孤貧埋葬無力者贈棺木錢米勿令人知人以爲有隱德云年七十九卒子必祿例貢必祓附貢必

和從九職

張申祿字帝授西關人聯鳳五子候選布理問性孝友幼時奉二親克承歡親臥病累月侍湯藥無倦甫冠明延壽大義兄弟克廉讓三兄官浙西夫婦相繼逝凶訃至申祿方重病未瘳力疾携醫相隨奔迎兩柩往返數千里不辭勞瘁二姪僅數齡撫如已出生平好義樂施嘗捐四百金助修省會貢院郡昌黎書院圯獨豎一齋郡縣修建學宮考棚及邑剝賓興會皆輸重貲邑中興立義學捐租數十石爲書院膏火倡建昌峽春暉橋功最鉅暨諸橋梁路道有工作必輸

金金必厚戚友中昏嫫死葬力不贍者加周恤夏則設茶局以蘇行旅每穀貴減價周鄰里辛巳大歉計口給穀鄉人賴以全安乙亥鄰村失火延數十家按戶餽錢米其義行無不頌之者年六十九卒卒時出平素里黨質貸文券力不能償者盡焚之邑侯曹人傑撰有傳邑侯龔笙銘其墓子曰榜秉機曰杰俱庠生秉機授縣丞職曰榜尤工詩著有雲林草西樓逸編滌令曹舉孝廉方正辭不赴

楊福豫號小滄防里人滄石仲子出嗣叔父曰鯨幼穎悟讀書目十行下精鍾王楷法天文歷法勾股算術旁及堪輿岐黃應童子試受學使王省崖知目爲西江才士第一手楹書贈之云大蘇著富五千卷小范胸藏十萬兵其器重如此弱冠中嘉慶丙子科鄉試己卯會試不第明年遂以疾卒於京師福豫於經無不通而尤精於書所著有武城訂悞康誥臆評高宗彤日仲虺之誥禹貢五服解等篇皆能發前賢所未發己卯留京時嘗謁閣學鮑覺生縱談及於是鮑引閩百詩古文尚書疏証福豫退就閩書辨正百餘條更質鮑鮑大驚服拊其背曰老兄固非一世才也初滄石博於學節俸置書數萬卷使福豫校訂政餘輒

叩其所得歷寒暑無虛日出守二載終於官福豫哀
毀喪葬盡禮奉三母以孝聞性高淡與人落落日惟
據胡床坐萬卷中博覽躬行仿黃陶菴自鑒錄作日
記十九卷一以攝心治氣爲宗殆庶幾乎古大儒爲
己之學云

萬上遴字殿卿桐人拔貢生幼失怙聰穎過人耿介
拔俗酷愛輞川詩畫行草細筋入骨珊珊欲仙晚精
山水林壑深遠有尺幅千里之勝一時名卿無不折
節下交互相唱酬欲作布衣忘年友曾屬關嵐先生
寫鏡吾圖手卷一軸其題詩者類多不世才如金蘭

哇黎湛溪曾賓谷張四香聶蓉峰龔西原吳蘭雪諸
公輩各種題咏備極風雅其尤稱絕調者更莫若許
廉使之雙清心迹高徐孺三絕才名老鄭虔二語足
以想見其爲人子孚生員頗有父風

劉大文字國華劉家坊人國子生敦行不怠事嫡母氏
孝居二親憂禮而哀營祠屋立祭畝享祀無忒歲歉
穀昂貴減直以應或弗能婚相與謀成其伉儷里有
貧者某素謹愿劉重之與以資使賈其友失偶爲續
娶旣而友負人責索之急將鬻妻償劉聞之皆代償
所負天成磨腦諸橋道贊衆樂成計費五百金昌山

春暉橋助鐵鎖陸千餘斤其慷慨如此性灑落愛讀書喜延文士構別業花草園亭坐客無虛日宛然有雅人高致云年六十有七子三鳳岐援例授州同

鍾承欽字明侯雁塘人附貢性溫和方直勤於學其父明恭好施與承欽亦然邑西彰善鄉橋道壞者修之里黨中貧者餼之病者醫之死無所歸者殯之遇酷暑通衢置茶局往來行人利焉故至今猶嘖嘖稱善行云

袁山號晴峯車田人家貧好學刻苦未弱冠卽藉硯田爲生涯遊其門者造就多知名士性嚴正足不履城市間遇諸塗雖童子對之亦肅然也老而不遇以歲貢

恩賜國子監學正年踰七十卒

張德謙號益齋西關人嘉慶庚申舉人善吏治歷署直隸武強涑水故城廉明風厲兩獲盜案制府重之補廣昌知縣甫下車訊巨案得實邑人帖服會差辦佛爾門道舊病復發遂罷任而歸年五十有二卒

袁壽齡號靜山車田人年十歲與童子試郡守高廷樞命屬對曰窗外芭蕉映紙綠卽應聲階前芍藥襯袍紅高奇之贈以詩有十齡好童子一介小書生之句

旋以春情詩受知督學李綬李稱其他日不爲名臣
必爲名士其幼時譽聞有如此比長學益富漢唐而
下諸篇什辨若淄涇披吟刻苦幾於李長吉分宜唱
渭城者首推嚴介溪靜山其流亞矣爲制藝橫縱排
冪不拘鄭孔程朱獨成一家言卽古體亦若是性孤
介附郭而居足弗溷塵市間或遇之則惟酒樓茶肆
中白眼青天彷彿旗亭畫壁時也所著作六千餘首
小袁山房全集僅見十之三惜多病一榻一几未能
遠出使放眼名山大川當必能鑿幽槌險云兩中副
車不遇年五十一卒

補遺

周與學字可共醴甌人精通經義學者多遊其門黃太
常曾從之受書洪武乙丑太常赴試臨行贈詩有京
華咫尺觀光近道路馳驅去國賒此去禹門知變化
蛟龍終不困泥沙之句是年果會元及第後輔導皇
孫薦與學爲國子監司業任數載以年老乞退改授
本邑訓導

胡銘俊字仲賢水南人洪武間官大理寺評事年七十
二致仕仁孝純篤家饒裕喜賑卹貧乏人咸稱德以
次子彥清爲黃大常婿遭株連并所著述抄沒無存

夕宜縣志 卷二二
胡永常字久徵水南人秉性醇樸力學弗倦中永樂甲午舉人任高郵州訓導捐俸倡修學宮教導有方士人尊爲師德長惠崇祀名宦今六都新址登雲坊卽當時與鄉舉謝文同建故迹

張瑀字瓊佩泗下人宣德三年選貢九年授布政司經歷會征徭大舉師老餉匱時出碩畫贊佐措置井井兩臺深器其能委任轉輸帑不糜而士皆夙飽訖奏膚功後積劬成疾引告歸里軍府第其勞績上聞膺殊擢授湖廣按察司僉事終不就居家以廉讓型俗卽先人故廬葺宗祠以收卹族衆知縣周瑛爲建承恩坊卽今祠頭門故址額猶存焉

袁希孔字淑我紐村人萬歷二十八年舉人任四川筠連知縣政尚廉平捐俸置學勸農桑除盜賊時土寇侵境肆行劫掠希孔廣招鄉勇躬率堵勦民賴以安以功陞廣東肇慶府通判去之日士民遮留立碑頌德因假道省墓病卒於家時年六十歲

李元斌號柏溪雙源人飲賓天性孝友處事公平居族長十餘年置祭田隆享祀立條規鄉中強暴者化之弱者扶之眼見五世年八十六卒子三之巖歲貢生之嶽授登仕郎之崑郡廩生孫曰台曰京曰谷曰蒼

俱諸生日可廩貢湖口教諭曾孫錫榮附生錫寵附
生

